

春秋屬辭辨例編

春秋屬辭辨例編卷五目錄

書王師

以諸侯之師不曰以而曰從

不言會及

不書戰

書從

王爲天王諱伐辨不使天子首兵辨

書敗績不書敗績書敗以自敗爲文

貴桓王不當伐

王臣會伐

秦晉交兵

書晉書人書國褒貶辨

伐敗書不書褒貶辨

齊晉交兵

諱伐盟主書次辨

吳楚交兵

書爵書人褒貶辨

書人書國褒貶辨

楚貶詞辨 柏舉書蔡以師褒詞辨 雞父不書

吳越交兵

春秋屬辭辨例編卷十五

錢唐張應昌學

○書王師

以諸侯之師不曰以而曰從不言會及不書戰書敗績不書敗績書敗以自敗爲文

書從王爲天王諱伐辨不使天子首兵辨 賁桓王不當伐鄭辨 伐鄭諱不書敗辨 王人書字善救衛辨

王師令不及魯不書隱九年鄭以王命來告伐宋成元年王人來告敗傳於此二處發來告之例明他皆不告也

趙汭屬辭卷十五

傳載隱五年王使尹氏武氏伐翼王命虢公伐曲沃桓四年王師秦師圍魏皆不見經事在西方令不至魯也隱九年鄭以王命來告伐宋時鄭伯爲王左卿士王臣不出王師不行故但書公會齊侯鄭伯鞏帥師會齊鄭而已至三國從王伐鄭始見經三國來告也至齊抗王命合諸侯以納朔魯亦與焉於是王人救衛之令始及於魯

又卷七

王師於諸侯不言敗諸侯不可敵王也於夷狄不書戰夷狄不能抗

王也

程子經說

桓五年伐鄭天王猶能舉征伐之權也莊六年救衛天王猶能執廢置諸侯之權也夫使伐鄭而鄭服則諸侯無有不臣者矣惟其伐鄭而鄭不服然後王命不行於天下使救衛而黔牟立則諸侯無敢不稟王命而自立者矣惟其救衛而朔卒得以自立然後王命益不行於天下春秋之初天王能舉政刑惟此二事而僅止於此則鄭莊之抗王五國之納朔擢髮不足數其罪矣

呂大圭或問莊六年

書王師三一則傷威毀重親屈伐鄭之師一則兵寡力弱不成救衛之功一則背盟棄信卒致徐吾之敗王綱之委靡具見

齊履謙統紀

王師見經者三事伐鄭陳蔡以從王書王室猶有可與之機也救衛王人之微以子突書猶可以爲天下共主也至徐吾氏之役不惟無制夷狄之道而敗績大書不隱於是失政於天下也

趙訪金鎖匙

周衰外寇侵侮諸侯暴橫天子之師屢貽挫辱聖人書之於經者四

甚傷之也隱七年天王使凡伯來聘戎伐凡伯于楚邱以歸成元年  
王師敗績于茅戎此外寇之侵侮也桓五年蔡衛陳從王伐鄭莊六  
年王人子突救衛此諸侯之暴橫也

沈棻  
比事

天討之見於經者伐鄭救衛而已伐鄭而敗績救衛而無功不書諱  
之也

顧棟高  
大事表偶筆

敗績於茅戎可書敗績於鄭不可書也王伐戎而敗可書狄伐周而  
入之不可書也書其所可書是春秋所以施於周魯之義也

李光地  
榕村集

周官大司馬之職及師大合軍以行禁令以救無辜伐有罪大合軍  
者方伯連帥各以師至而大司馬監臨之召虎南征方叔北伐傳稱  
天子之老請帥王賦元戎十乘以先啟行是也又曰若大師則掌其  
戒令謂王親在行大司馬巡陣眠事而賞罰常武之詩王謂尹氏命  
程伯休父左右陳行戒我師旅是也至春秋王師出而見挫矣

方苞  
通論

昔者厲王之末荆蠻嘗背叛矣宣王命方叔征之其車三千詩人侈其盛曰嘽嘽焯焯如霆如雷然後蠻荆來威也徐方嘗不庭矣宣王自將征之赫赫業業有嚴天子詩人侈其盛曰王旅嘽嘽如飛如翰如江如漢然後徐方來同也蓋王畿千里出車萬乘論財則富論兵則強居重馭輕諸侯畢服豈有天子削弱而偏師能伸其號令者乎周室東遷壤地褊小天子不能具六軍伐鄭而從者僅陳蔡衛之微者救衛則王室之微者鄭敗王師衛抗王命由削弱也推原本始則由于平王棄豐鎬就洛邑地狹兵寡故也

陳遷鶴紀疑

相五年秋蔡人衛人陳人從王伐鄭

三國以兵會伐而曰從王明君臣之義也君行而臣從正也戰于繻葛而不書戰王卒大敗而不書敗存天下之防也

胡傳

言會及臣從君之辭也

陸審微旨引咬助

○天子得用諸侯之師故不

曰以而曰從王臣聽君之辭也

程端學本義引呂祖謙

○桓十四年宋以

四國伐鄭僖二十六年公以楚師伐齊定四年蔡侯以吳子及

楚人戰柏舉皆曰以此言蔡衛陳從王伐鄭天子無敵故曰從

王以尊之尊桓王所以甚鄭伯之惡

孫復尊王賢微

○穀梁曰舉從者

之辭爲天王諱伐鄭也非也直言從王伐鄭文順事明可不煩

解矣傳說妄

劉敞權衡

○三國從王而大國不能從之罪見矣三國

以卿出而君不躬親之罪亦見矣

李昉復集義引謝提

○天子討而不伐

諸侯伐而不討鄭伯不朝王命諸侯討之此古之制也今桓王

從三國之師屈天子之尊效敵國之交兵傷威毀重微弱甚矣

沈棐此事

○其不書王師何王爲重也

汪克寬纂疏引薛季宣

○諸侯有罪天

王不能號令方伯討之而至於親行三國君不自行而遣將王

室之衰諸侯之強可知矣春秋變其文曰從王以示一令之出

莫敢不從之義

絲覽經解

○自隱以來天子不能命諸侯諸侯不能

奉王命以討諸侯亦久矣王伐鄭而從之者僅三國三國豈誠

尊王哉蔡衛陳之讐鄭久矣隱二年鄭伐衛四年宋衛陳蔡伐

鄭十年宋衛入鄭又與蔡入戴而鄭復伐三國之師取之桓二

年陳與鄭雖會於稷蔡與鄭雖會於鄧未有成也衛之隙未解

也衛之隙未解則陳蔡之黨未散而讐鄭之心未已也今天討

加於鄭而三國從之亦託公義以濟其私忿爾

呂大圭或問

○自周

室之東諸侯不稟王命者有之未有叛王者也鄭莊以周人界

虢公政命祭足帥師取成周之麥禾以人臣而稱兵犯上不曰

叛可乎左氏謂鄭不朝王王怒而伐之舍其大罪舉其小愆後

讀史者咎桓王不當輕於伐鄭此誤也

家鉉翁詳說

○春秋不志王

室事天子征伐不可見以從王伐國見之

莊存與春秋正辭

○以人從



已曰以己從人曰從言從王者若諸侯不召而至不令而行

也

孔廣森公羊通義

○書從王尊王也三國稱人微者也王自將而以

微者從亦罪之也其不書王師何王爲重也不言戰諸侯不可

敵王也不言敗績爲王室諱也王師敗績于茅戎何以書王不

可言敗王師猶可言敗焉爾

牛運震傳

○書從王恐是國史之體宜

然孫氏不使天子首兵之說非也

張自超宗朱辨義

○不書天王伐鄭

者王命不至於魯從三國告辭

方苞直解

○不書王師敗績先儒謂

聖人諱之不忍言非也此係魯史不書也何則魯史之文從赴

告鄭伯老好當日且使祭仲勞王問左右必不以敗王師告在

王則自不當以敗告魯史何從知之則但書伐鄭而已

顧棟高闕文篇

○汪氏說見尊王書法門○夫鄭以情則周之懿親也以國則

周之左右藩輔也况維邑彈丸之區無山川險阻西迫秦翟南

接荆楚儻有外侮猶賴爾鄭以朝夕夾輔王家不謂世職司徒方假王靈以雄視甸服挾王質子兩掠京畿天子震怒敢抗王師莊公之罪浮於戎狄矣

馬驥左傳事緯

○九伐之權出自諸侯大夫

春秋所由作也大書三國從王伐鄭征伐自天子出諸侯用命二百四十二年從未有乾綱之振如此者乃至一敗不起先儒謂鄭不朝王罪止削地貶爵王置宋魯弑君之賊而親伐鄭故王不稱天非也方望溪曰幽平之後欲振既墜之王綱當先之以征誅而征誅之行莫急於討鄭鄭爲王室近親甸服之伯王朝卿士也王崩之次月興師以伐王都其罪乃九伐之法所未有王固知其力之不勝故繼序十有四年不敢聲言其惡且桓王討伐非盡不能行也惟不行於魯宋以鄭莊怙亂而齊爲之輔耳莊王黔牟之立鄭齊魯抗王師而納朔使桓王初年遽討

魯未則齊助於外而鄭起於內王室之憂及宗社矣故咎桓王之不能修明德政以繼文武可也而謂其不當伐鄭置亂賊於不問非其實也

姜炳璋讀左補義

○斯時陳佗方藉鄭力弑太子有國

其從王師不過勉強應命子元獻攻瑕之策曰陳亂莫有鬪心言德我而莫敢鬪也觀蔡衛不支知二國猶爲王敵愾而陳則甫接刃而棄甲矣蔡衛之奔王卒之亂皆由於此王卒大敗射王中肩陵天子至此而寤生猶云不敢乎哉

漢

### 莊六年春王人子突救衛

不稱師於例爲將卑師少以卑官帥少師救衛不能使衛朔不入是無功也

孔疏

○救衛者存黔牟而拒朔也朔構兄篡國天討

當加春秋王旅之出合司馬九伐之法者惟此一事

張治集注

○自

伐鄭以來王師不書其書救衛何救衛無功也救衛無功而後

王命不行於天下

陳傅良後傳

○方四國欲以兵納朔若王伐四國

而討有罪朔自不得納矣何待子突之救不能伐四國而徒救

黔牟非矣雖然四國之強非王師之所能加故不得已救黔牟

葉夢得春秋攷

○朔得罪於王王當明其罪布告諸侯乃不能明示天

子之命自同於列國之兵爭卒不能救而五國竟破衛納朔王

室不競而威令不行可悲也

吳澄纂言

○書王救則朔爲天王所不

與而五國黨惡之罪著矣

方苞直解

○五國之君抗逆王命伐天王

所立是天王之法不行於諸侯至出不得已而救衛與諸侯之

恤隣救患者等其亦陵替衰微之徵也諸儒乃以救爲善之王

師之出無可褒書救者傷天王之與諸侯敵也王人書字何足

以定義

張自超宗朱辨義

○陳氏遷鶴說見書救門

成元年秋王師敗績于茅戎

公羊作賀戎

左春晉侯使瑕嘉平戎於王單襄公如晉拜成劉康公徼戎將  
遂伐之叔服曰背盟而欺大國此必敗不聽遂伐茅戎三月敗  
績于徐吾氏秋王人來告敗杜注不言戰王者至尊天下莫之  
得校故以自敗爲文書秋從告○京師敗曰王師敗績于某左

例見莊十一年傳○穀梁不言戰莫之敢敵也爲尊者諱敵不諱敗爲

親者諱敗不諱敵尊尊親親之義也○不言戰王者無敵天下  
莫敢當也莫敢當其言敗績何天下之勢大矣非有能敗王之  
師者也王自敗也劉敞傳○戰然後言敗績此不戰何以書敗績

言自敗也凡王有事譏不在諸侯諸侯有事譏不在臣子如天  
王出居于鄭鄭棄其師皆以自致之文書之雖有敵國亦自致  
也梁亡齊人殲于遂王師敗績于茅戎無敵國之辭也陳傅良後傳

○王者無敵於天下故不言敗績若桓五年戰于緄葛王卒大

敗祝聃射王中肩僖二十四年類叔桃子奉太叔以狄師伐周  
大敗周師獲周公忌父原伯毛伯富辰昭二十二年鞏簡公敗  
績于京司徒醜以王師敗績于前城之類皆不書爲王室諱也  
雖有狄師亦不志者母弟之難起於蕭牆惟書天王出居以見  
義而公卿之獲皆不忍言也戎狄不可以君臣治故直書王師  
敗績于茅戎不必諱可也趙汭屬○書法尊王之義與王自取

敗之道及諸侯之不勤王咸得而見汪克寬纂○魯諱敗不諱

戰周諱戰不諱敗莫敢與王戰者也戰而勝猶恥也戰之恥甚

於敗故諱戰也李光地○鄭伯敗王不書此何以書戎敗王師

猶可言也諸侯敗王不可言也方苞

公羊曰孰敗之蓋晉敗之曷爲不言晉敗之王者無敵莫敢當

也若晉敗王師而改曰茅戎是掩惡也如何懲勸乎陸菴

陸菴

○公羊所云晉敗之者罪晉之詞謂晉不能爲王與伐戎之師而平戎于王劉康公伐戎而晉不以師從王師敗績而晉又不以師救故爲歸獄之詞以罪晉耳啖氏駁之非是

張自起宗  
朱辨義

左氏有瑕嘉平戎之說攷定王時士會問殽烝而王能教之鞏朔獻齊捷而王能責之且爾時晉之執政爲士會卻克斷不至有敢敗王師之事也

張尙璩公  
羊折諸

○王臣會伐

征伐自諸侯出昉於何時乎春秋之初鄭人以王命來告伐宋於是三國會於中邱隱九年強如齊僖詐如鄭莊鯁鯁然懼無以服諸侯借王命以臨一宋蓋詩書所載之征伐未有不稱述王命者非王命而伐人者叛也故平桓莊僖惠之春秋王室尙可爲也莊公以前聖人望周之意惓惓焉伐鄭之舉京師猶有書伐者救衛之舉京師猶有

書救者莊公以後經絕無之矣王命虢公伐曲沃隱五年立哀侯諸侯

猶有奉王命立國君者王命虢公討樊仲皮莊三十年諸侯猶有奉王命

伐叛臣者莊公以後傳絕無之矣征伐自諸侯出蓋始於齊桓之伯

也愚按陳氏謂始於莊十四年單伯會伐宋此浴以單伯爲王臣之

謂又謂莊二十七年王命齊討衛亦沿傳說子頊事之誤也故從

削召陵之役權移於齊城濮之役遂移於晉日久而諸侯以列國視

京師矣晉召而莫敢不來矣處父救江王叔桓公與焉晉侯伐秦劉

子成子與焉春秋猶不書也鄆陵以後晉人克敵而驕成十六年之

尹子遂與諸侯同序一卿既會伐於十六年之秋二卿復會伐於十

七年之夏跋履險阻曾未息肩蓋晉厲暴虐不得不從也抑嘗論之

春秋之初王室有可爲之機而沮之者二春秋之末王室有可爲之

機而棄之者一齊僖鄭莊馳騁東周之間號爲小伯一旦天子震怒

自將伐鄭蔡衛陳皆奔走從命而寤生敢抗衡天子是沮之者鄭寤



生之罪也齊僖鄭莊既歿伯圖未興王人子突救衛又可爲之機也而齊襄又敢於伐衛敢於抗王是沮之者齊諸兒之罪也平邱以後晉失諸侯楚拘唐蔡二君唐蔡不能討楚而歸之晉晉無以合諸侯而歸之周此東周所無之機會也左氏曰劉文公合諸侯於召陵此春秋以來所未見之文也會十八國之師堂堂之陳正正之旗而止於侵楚陋矣哉有大可爲之機而自棄之者周之罪也召陵以後天下無伯而諸侯又有私伐矣天下有伯周不復興此世道之所以爲

春秋天下無伯齊晉不復興此世道之所以爲戰國

陳則通提綱

晉王臣會伐三會侵一

愚按莊十四年單伯非王臣趙氏誤列入云會伐四今改正

晉伯中衰厲

公三請王臣伐鄭而鄭從楚益堅中國無伯劉文公合諸侯于召陵

以謀伐楚無功而諸侯復散皆天下大故王伯升降之會也

趙汭屬辭

王臣與伐自成十六年晉厲公伐鄭始前此桓文倡霸徵兵討貳不

聞請命於王非禮也而實霸迹之盛也及楚氛益熾中夏懾威諸侯  
疑貳然後援王臣以屬之禮也而實霸事之衰也

方苞  
通論

成十六年秋公會尹子晉侯齊國佐邾人伐鄭

初以王卿士與伐也春秋不以諸侯用王師陽處父之救江王  
叔桓公不書前年伐秦之後劉子成子猶不書也於是厲公恣  
矣以尹子與齊國佐邾人序甚矣

陳傳良  
後傳

○前此未有以王臣

與伐者桓文征伐猶以尊周安夏爲心未嘗瀆王臣以臨師旅  
晉厲以私怨伐秦則挾劉成以借行以攜貳爭鄭則要尹單而  
屢往於是王臣奔走道途爲霸者之用矣春秋於伐秦不書劉  
成於伐鄭書尹單苟伐秦書劉成則爲朝王請命而伐秦爲善  
矣伐鄭不書尹單則無挾王臣之罪而討貳抑楚不爲過矣聖  
人筆削豈不深切著明哉

汪克寬  
纂疏

○書王臣會伐假天子之威

而服人也

李廉會通

桓文之師以尊王恤鄰爲號義旣足以動人

而力又足以攝之故未嘗請命於王晉霸旣衰諸侯攜貳故假

王命且援王臣以誼之據左氏伐秦之役劉子成子實與焉而

經不書蓋書劉成會伐則似因朝而受命於王無以著其因伐

而朝之慢伐鄭不書尹單則霸者徵會討貳之常辭無以見晉

霸益衰假王靈以屬諸侯而終不能服鄭爲世變之尤大矣

講解

○前伐秦劉成二公不書故王臣會伐自尹子始所謂挾

義

天子令諸侯至是方顯然彰著

李光地榕村語錄

○諸侯有罪則天子

命方伯以討之晉主軍令而王臣與是名爲奉王命而實則役

王臣矣故春秋據其事直書尹子晉侯齊國佐邾人以見王臣

諸侯大夫之齊等也

張自超宗朱辨義

○自此以諸侯用王師而王臣

奔走與列國大夫無異又一變也高氏閔謂其扶義以令天下

誤矣

顧奎光  
隨筆

○陳氏傅良謂初以尹子與齊國佐邾人序爲厲

公無道之甚非也桓公倡霸之初已有王臣列序者矣諸儒益

因晉厲無道每事必求其罪端不知王臣會伐非與盟之比盟

乃以不信施於尊者若彰天討而王臣蒞之未爲害義也厲公

時晉霸中衰欲假王靈以振之事周之禮最謹故與師屢請王

命討罪以歸京師諸儒未察其實耳

方苞  
直解

成十七年夏公會尹子單子晉侯

等六國

伐鄭

晉未能服鄭故假天子威周使二卿會之

杜

○晉三假王命合

諸侯以伐鄭而鄭不服伯圖不振可知

孫復尊  
王發微

○晉厲無道而

能數合諸侯力捍強楚者假王靈以令天下也

高閔  
集注

○桓文襄

成之霸嘗據諸侯伐叛矣未嘗屈王師下伐也屈王師下伐如

於晉厲陵夷甚矣厲公暴戾以力屈鄭責魯兵之後期罪詭係

之不我用於是挾天子之命屈尹單以令諸侯

趙鵬飛經筵

○再假

王以伐鄭而兩王臣並出則晉役王臣之罪甚矣

張自超宗朱辨義

又

冬公會單子晉侯

等六國

伐鄭

定四年春公會劉子晉侯

等十七國

于召陵侵楚

傳曰劉文公合諸侯于召陵謀伐楚也晉合諸侯至平邱而止

則是役劉子爲之劉子定內難復辟于周而楚納子朝於是合

十八國之師伐楚未有盛於此時者也以周之不競而能若是

俄而劉子卒君子深悲之

陳傅良後傳

○蔡昭侯如晉請伐楚晉請

命於周天子特使其老臨之大合十八國之君若能奉辭伐罪

豈不多於齊桓召陵之功哉奈何以伐號召而以侵止也

王樵輯傳

○秦晉交兵

書爵書人書國衰敗辨

伐敗書不書衰敗辨

車鄰一詩美秦仲也秦之強大實始於此有車馬禮樂侍御之好焉

至襄公平戎取岐豐之地受顯服駸駸爲西方之強矣然春秋七十有五年無見經之事盟會不同聘問不通是時天下惟齊楚爲強而晉亦未之聞也至僖十五年書曰晉侯及秦伯戰于韓增天下之強國而四前此春秋略秦晉一旦以夷狄獲諸夏之君威動天下矣首納夷吾繼納重耳穆公已有伯視諸侯之心豈料城濮一勝晉執牛耳穆公已有不平之志與晉周旋一無所得大恩易怨人情之常圖鄭之役二國兵爭自此始矣晉文艱難險阻十有九年穆公畏晉猶隱忍不發襄公新立未免以童稚目之千里伐人襄公出其不意敗之穀陵悔過若不自容奈何又爲彭衙拜賜之師濟河焚舟之役不能懲忿窳欲之過也至文四年晉侯伐秦始踐誓言斂兵不報康公不願晉甥之愛納不正以伐喪趙盾不顧先蔑之請不謝秦而與戰康公不佞又興忿兵河曲以後俱無足論自晉失伯秦爲楚援自是

秦之伐晉者四蓋以分晉人治楚之師晉之伐秦乍勝乍負無大得志二國兵爭六十有九年至襄十四年伐秦之役兵爭始絕

陳則通提綱

秦晉之爭自僖三十三年迄宣十五年三十餘年之間無有虛歲或以書僞書人不書將帥爲褒貶非也君將稱君大夫將稱人春秋常辭也春秋之書秦固常稱人雖大夫將未嘗書大夫用大眾則書帥其稱秦伯者二戰韓術聘是已秦伯使術來聘卽楚子使椒來聘吳子使札來聘之例也晉侯及秦伯戰于韓獲晉侯此楚子會孟吳子會黃池之例也吳楚浸盛而書子秦伯崛起而書伯皆著其實而已若其曲直之辨則存乎其事始書秦人入滑明秦之犯中國也繼書晉人及姜戎敗秦師于殽二年書晉侯及秦師戰于彭衙見秦之不悔而伐晉晉之志戰而敵秦也冬書晉人宋人陳人鄭人伐秦見晉人再勝而猶用師也三年書秦人伐晉見秦人再敗而不知悔也四

年書晉侯伐秦見報復連兵之不已也未及數年又興彭衙之師蓋其積怨深憤務欲得報而後已至三年濟河焚舟取王官及郊封殺尸而還然後秦人之憾得逞四年晉人圍祁新城以報王官之役而秦不復報彼其蓄憾特在殺函一敗之恥故自取王官雪殺恥之後不復報晉所以全其勝也至若令狐之戰則秦晉皆已易世矣晉襄卒使先蔑如秦逆公子雍秦以師納之既而晉人中悔遂與秦師戰晉不謝秦秦納不正皆罪也故秦穆晉襄之讐自殺始秦康晉靈之讐自令狐始殺之敗所以兆彭衙之戰令狐之戰又所以兆河曲之戰自是而後晉侵崇以致秦師之伐秦伐晉以致晉人白狄之師晉狄伐秦又以致秦桓伐晉之役更相報復闕再世而未已

呂大圭或問

晉襄急於報秦怨不得不緩於治楚以故商臣弒君而不問滅江滅六而不救其後卒至秦楚合而中國不競爲可惜也文公之伯秦實



輔之內諸侯會盟秦頗與焉城濮之戰又助晉以敗楚師秦交索諸侯以勤勞中夏未可以督過之也使晉實有安內攘外之心西結秦好而南抗楚師藉強隣合諸侯并力一隅則亦足以弱楚矣楚弱而諸侯安諸侯安而中國尊矣乃不忍一朝之忿怨成而兵結遂不得不釋楚而一意向秦由是楚無所忌而益肆吞併矣由是秦知東諸侯之不我與而爲自強之計矣由是而秦楚合矣秦楚合而晉事難爲矣張自趙宗朱辨義文四年○晉文城濮之戰實用秦師至會翟泉秦人亦與明年伐鄭晉秦共之其怨起於秦之私與鄭盟而留成以去使晉不得志於鄭耳秦之襲鄭固爲不義之師而知鄭有備滅滑而還無損於晉也襄之凶服卽戎實報秦盟鄭之怨非有恤鄭之公心也秦恥敗穀不能忘報人情之常孟明師來急宜修詞以謝而再敗之於彭衙豈非已甚哉王官之役濟河焚舟封穀而還晉未有喪師失地之

辱又興師以伐之何其忿戾之至邪兵連禍結罪實在晉

又

春秋於秦晉之爭前則詳書者所以詳其結好致怨之由以著晉之有得有失也其後雖有侵伐無關於中國之故故皆從畧其書秦人秦師亦不必其爲秦伯爲秦大夫如中國之舉爵稱名稱帥師也然亦非春秋畧於秦詳於楚爲有進退予奪之義蓋秦不爲中國患故其事不必詳楚爲中國患故其事不可得而畧也

又襄十一年

秦晉兵爭六十九年始於轍而終於十三國之伐其在秦穆公之世與晉襄交兵五秦康公之世與晉靈交兵三秦共公之世與晉靈交兵一秦桓公之世與晉成交兵一與晉景交兵二與晉厲交兵一秦景公之世與晉悼交兵三秦歷五君晉歷六君干戈日尋疆場暴骨兵連禍結未有如二國之甚者也夫自獻穆相好再世爲昏惠文得國咸資秦力城濮之役秦之龍盾虎韋悉用輔行晉是以大破楚成

霸業秦之於晉功多矣穆不能終而釁兆於圖鄭怨結於敗殺則秦有以取之自是以後兵端相繼秦康公晉之甥也渭陽之篇克念舅氏而卽位以來日與晉構晉實不能親既求君於其國又變計而擊之晉則無禮豈能堪乎二國之怨彌深秦楚之交始合嬴且坐大晉弗知也共公初立晉欲修好趙穿曰我侵崇秦必救之求成而伐其與國召戎速寇何成之有穿有異志故迂其謀而晉於是失計矣及秦桓之立晉宜釋怨結好乃又偕白狄伐秦而晉於是再失計矣輔氏以來秦楚益固蜀盟之役秦人先諸侯而首從白狄介在兩大之交戎性無常唯利是視何昏姻之可恃哉令狐懷疑要盟不信麻隧大舉敗傷孔多秦雖不競而虎視西戎徘徊俟隙固未嘗一日忘報晉也呂相之絕秦也以殺師責穆以令狐河曲責康以輔氏責桓其詞多文秦不能對而左氏特舉其背盟召狄以正其懷詐取敗之故

雖二國之曲直經不明書要之欲求成而先加兵既從盟而後食言  
狙詐相尙兵戈無已秦之共桓晉之靈成景厲固兄弟也晉悼復霸  
攘楚而兵挫於秦蓋文公親秦以戰楚故力倍而功高悼公爭楚而  
伐秦故勢罷而志惰下軍違命諸帥遷延於是晉之報秦至是懈矣  
晉既不急報秦秦亦閉關自守山河四塞不與晉爭兵戢於外威著  
於內鍼于千乘而卒歸國包胥七日而後出師養銳觀時將有大圖  
其後于孫終能并六主而有天下未必不肇基乎此也

馬驢左  
傳事釋

秦誓皆以爲敗殺歸後所作史記則以爲王官之役封尸歸後所作  
史記是蓋敗殺悔過則不復與彭衙之役矣何至於三出王官之役  
亦無大捷不過晉人不復與校而穆公藉此自文及其封尸發喪不  
覺有媿於中而爲此誓然次年又伐戎則終未嘗踐誓也

全祖堯經  
史問答

自晉主盟舍秦無加兵於晉者會夷儀之歲秦晉成而不結明年盟

于未而南北之勢成楚子曰釋齊秦他國請相見也是戰國之萌也

車傳良後

海文十年

唐荆川說見晉楚爭盟門文十六年

王伯厚曰秦自殺之敗卽楚見呂相絕秦故穀梁曰秦之爲狄自殺戰始陳止齋曰楚之霸秦之力也自滅庸以後秦爲楚役余按秦晉楚離合之故見於經傳者甚悉迨吳入郢而秦救之楚以不亡則晉之絕秦乃所以存楚也二百四十年之樞軸轉焉

張向環穀梁折請卷首

晉獨當一楚猶或不敵復加以秦則晉不支矣晉與秦合而楚敗楚與秦合而晉敗自秦晉報復紛然晉之全力在秦不在楚至楚滅庸於是秦楚之交合矣

顧奎光隨筆

自三晉之分力不足以支秦楚則楚之危者以安而秦之弱者以強故晉之存亡秦楚安危強射之繫而春秋之一大變革也秦國僻小

難於西戎穆康之世與晉構釁他國用兵鮮矣傳稱穆公并國十二  
開地千里其所攻取大抵皆在戎翟之界方是時泗上諸侯奉盤敦  
而爭長者嗷然於壇坫之上喜而朝怒而叛者紛紜於晉楚之境其  
視秦若不甚可畏也秦亦漠然無所與擁崤函之固迴翔熟視而不  
敢以爭一日之雄左氏曰秦穆之不得爲盟主宜也不知盟主非秦  
之所欲也秦惟不自爲盟主故能蓄積其氣勢徐以待諸侯之衰而

乘其弊

姜宸英  
湛園集

秦并天下在范雎遠交近攻之一言然其先世所以富彊坐大西陲  
者則在近攻而遠者不交秦地僻遠與戎翟伍不與中國之事中國  
以此輕之不知秦得志正在此使當日求好中國數盟數聘將竭財  
力奔走道路之間又何暇畢力於耕戰之務坐致富彊哉

魏禧叔  
子集

賈生有言秦孝公據崤函之固擁雍州之地君臣固守以窺周室鳴

呼此周秦興廢一大機也春秋之世秦晉兵爭秦所以終不得逞者以不得崤函也惠公之入賂秦以河外列城五東盡虢略南及華山蓋桃林之險在焉賂秦則晉之地險盡失蓋以空言市秦而實不與逮戰韓後秦始征晉河東不二年復歸之晉蓋其民不服耳穆公乘文公之沒而襲鄭苟得鄭其地反出周晉之東使衰絰之師不出秦將包陝洛巨崤函爲患且十倍於楚幸而崤師一敗逖逃竄伏其後迭相攻擊歷三四世終不能越大河以東成十一年秦晉爲成秦史顯盟晉河東晉卻鞏盟秦河曲截然如天塹不可越使三晉不分局全力制秦秦終不敢東出周室何自有窺關之漸哉

顧棟高  
大事表

世稱燭之武退秦師謂與展喜犒齊同能不戰而屈人之兵以余考之良不然兆鄭二百年晉楚之禍者燭武爲之也鄭之大患在楚唯秦與晉合則力足抗楚庇鄭而無患城濮晉合齊秦攘楚楚力屈遠

遁而鄭乃得安意事晉今秦晉伐鄭其實主兵者晉也爲鄭之計宜  
屈體以求成於晉晉退而秦亦退秦晉之權不失則晉之足以庇鄭  
者如故也乃間秦撓晉用三帥戍之未幾秦旋圖鄭使晉襄不禦之  
子殺鄭蚤爲秦滅矣自殺師起秦晉之仇不解楚且乘間以合於秦  
使晉力疲於西不得復致力於東楚得日翦東諸侯而無忌而鄭國  
晉楚之禍亦二百年不息犧牲玉帛待於二竟猶不得免是誰咎哉  
晉悼之興結吳撓楚楚之有吳患猶晉之有秦患也楚勢稍屈而鄭  
亦得以稍安然吳卒肆橫齊魯且惴惴焉向使秦晉合力足以制楚  
而有餘無用召吳中國不特無楚患并無吳患矣余反覆晉楚二百  
年事追原禍始未嘗不歎息于燭武之一言爲之階也

檇棟高媯  
之武論

秦穆非霸論趙氏汪氏說見下文三年秦人伐晉

僖十五年冬晉侯及秦伯戰于韓獲晉侯



左晉惠公之入賂秦伯以河外列城五東盡虢略南及華山內及解梁城既而不與秦伯伐晉戰于韓獲晉侯秦於是征晉河東○秦自襄公有岐周之地七世至穆公此爲見經之始是年齊桓伯衰而宋楚秦晉之變遽見李廉會通○胡氏本左傳以晉背

施怒却專罪晉而恕秦春秋無是意也以來告而書之著秦之

始強耳徐學謨春秋億○傳載陰飴甥會秦伯一篇一面晉侯歸國一

面秦官布置河東乃知秦伯伐晉全是爲此姜炳璋補左補義○楚初

見經其事則爲虜蔡侯秦初見經其事則爲獲晉侯甚矣秦楚

之強也其後楚爲患中國而秦安然無事於春秋之世者有晉

制之也張自超宗朱辨義○晉背惠蔭施以虛氣抗秦所以敗辱張洽集注

僖十七年傳秦歸晉河東

蓋河東之民不服故借質太子匱之名以歸之耳顧棟高大事表

僖二十八年夏秦從晉戰楚城濮

秦自入春秋來未嘗與中國會盟征伐今首從晉攘楚文公之力致之也是故非合秦不能勝楚非文公不能用秦

顯棟高  
大事表

僖二十八年冬秦從晉會温 二十九年夏從晉盟翟泉

秦與中國會盟惟于温翟泉輔晉攘楚最合正自後如蜀之盟且從楚撓晉矣蓋自城濮以後秦已甘心爲晉役秦晉合則制楚有餘使無殺燬秦晉之交永固中國之兵爭永息矣

顯棟高  
大事表

僖三十年秋晉人秦人圍鄭

秦晉之隙始此

左鄭使燭之武說秦秦與鄭盟使杞子逢孫楊孫戍之乃還○自穆公釋韓之憾從晉城濮盟于温于翟泉戮力同心未始有隙由燭之武一語而秦輔晉之心變矣以穆公之賢而所就止此豈非貪利忘義之失哉

李廉  
曾通

○燭之武一言使秦穆背晉親

鄭非利害深中秦穆之心詎能若是乎秦穆從燭之武之言而  
伐鄭者非愛鄭也利在焉故也從杞子之言而襲鄭者非憎鄭  
也利在焉故也心無晉鄭惟利之趨使外無弦高之謀內有三  
子之應豈復有鄭既以利輕絕晉亦必以利輕絕鄭利心一開  
不能自窒宜其葭蹇叔之諫而取殺之敗也

呂祖謙左氏博議

○晉文

報怨而喜功故邀秦以伐鄭秦穆恃功而視利故私鄭以倍晉

此一役也結怨交兵者數世晉失秦援而爲楚所抗自是役始

金履祥通鑑前編

○秦之背晉改圖雖因燭武之說實挾晉侯勤王辭

秦師獨下之憾以爲異日潛師東出可藉鄭爲接應耳東道主

一語適中其心曲此時已萌圖晉之志矣

顧棟高大事表

僖三十三年夏晉人及姜戎敗秦于殽

秦晉兵爭始此

左杞子自鄭使告于秦曰鄭人使我掌其北門之管若潛師以

來國可得也秦師及滑鄭商人弦高犒師孟明日鄭有備矣吾其還也滅滑而還晉先軫曰必伐秦師秦不哀吾喪而伐吾同姓吾聞之一日縱敵數世之患也遂發命遽興姜戎子墨衰絰敗秦師于殽○公羊秦伯將襲鄭百里子與蹇叔子諫曰千里而襲人未有不亡者也晉人與姜戎要之殽而擊之匹馬隻輪無反者○晉文死而秦伯襲鄭志在諸侯非直爲鄭滑而已使晉稍不自強秦將觀兵中原矣幸而文公有子發兵扼之秦疲敝而晉得世其霸業而論者必責其受惠背施薄人於險以爲春秋不與豈知秦晉之隙早兆於合兵圍鄭之日至是晉文身死未寒秦忽襲鄭滅滑晉襄苟置而不問是使晉襄不爲忘親事楚之齊孝則爲束手就執之宋襄矣家鉉翁詳說秦人自從晉圍鄭已識地形自周而東將以襲鄭乘便入滑得利而還非晉

扼之秦將長驅及東諸侯之國矣故殺之敗亦秦兵不敢東下

之一機也

季本私考

○晉文藉秦力以勝楚始通盟會抑楚以興秦

有拒虎進狼之意當其與晉圍鄭背晉而去已有爭雄之心使

秦得志於鄭乘勝長驅諸侯必有再受其毒者幸而謀洩於滑

師敗於殺秦兵不敢東下其過在秦晉讐殺者四五世晉力衰

而楚得復橫也

黃正憲翼附

○秦謀襲鄭狄攻齊衛乘文公之歿爭

衡中夏也晉兩敗之霸統遂定其功甚偉而先儒多以為病亦

未揆於事理之實耳

日講解義○又見文公以前卿將稱人門

○殺之戰左氏載

先軫之論是曲在秦也胡傅責晉與秦等以墨衰即戎為惡之

甚其於當日情理可謂頗矣秦背晉戍鄭使晉文不念舊德而

從子犯之請則秦已當擊矣觀不哀吾喪之言是晉文卒而秦

不弔也秦則無禮何施之為先軫非過激也至以墨衰即戎為

不可則古人有行之者徐淮並與魯公凶服命師費誓一篇列於周書矣晉爲盟主天下諸侯有相滅亡者雖在遠地猶當救之况乘晉喪踐晉境滅晉同姓晉君臣豈得晏然已乎彼固將繼先君之志爲子孫之謀自敗殺後秦不敢越境而圖東諸侯是敗楚者文之功而制秦者襄之力殺師之烈亞於城濮而顧重誓之必欲晉襄守居廬之節坐視秦師馳騁四境盡諸姬而不恤然後爲孝乎案○文公甫歿秦穆卽有覬覦諸姬之意襲鄭未成移怒於滑使晉襄拱手聽其所爲將大肆貪心漸次蠶食宋魯衛之國楚亦乘間而動王室危矣襄公毅然興師賊之雖過在後日報復而此舉先折其角扞王室而安諸姬厥功甚偉陳遷鶴紀疑○殺之師晉君臣以爲不立威則無以聲諸侯而警秦人非望之心不戰勝則無以立威也魏禧叔子集

文二年春晉侯及秦師戰于彭衙秦師敗績

左秦孟明視伐晉報殺之役晉侯禦之戰于彭衙秦師敗績晉人謂秦拜賜之師○秦穆殺陵悔過未幾尋怨再致彭衙之師是雖悔而未改也晉襄得志於殺可以已矣秦兵再至則修文告以卻之若展禽所以犒齊師者秦必愧而反矣不此之圖而

逞志再戰襄之罪也秦穆憤於敗而不能平晉襄扭於勝而不

能屈血氣用事終於稔怨結讐黷武殘民黃仲炎通說○秦穆悔不

用蹇叔而襲鄭以致敗非悔兵之不可用也故其報晉之心必

勝乃已如悔兵之不可用而保境息民何至復有此敗哉汪氏

以不書伐晉爲罪晉而免秦者非也張自超宗朱辨義○彭衙秦地伐

晉而戰于秦地秦師未入晉界也師未入界猶可以辭諭卻之

不則固圍以自守耳遽戰而敗之知晉侯之好勝也朱朝瑛畧記○

愚按未入晉境不必書伐經文簡要但書戰可矣趙東山以為惡秦不自反而喪師故書其敗不書其伐與汪說之穿鑿同

又 冬晉人宋人陳人鄭人伐秦

左伐秦取汪及彭衙而還報彭衙之役○秦以憤取敗晉可以已矣而復伐秦報復無已殘民結怨程子經說

文三年夏秦人伐晉

左秦伯伐晉濟河焚舟取王官及郊晉人不出遂自茅津濟封殺尸而還○秦穆初聽杞子之請違蹇叔之言是貪兵也愆而不能窒也復起彭衙之師報殺函之役是忿兵也忿而不能懲也今又濟河取郊何義哉胡○說者因傳有霸西戎一語子穆公以霸考傳所記則踰二年而穆公卒其謂遂霸西戎者殊非事實論者徒見悔過之誓列於周書遂以為聖人子秦穆聖人



特取誓之文而已非子秦穆也夫穆公自誓之言咎既往之失  
冀將來之善薄勇夫而貴良士惡媚嫉而思彥聖期以保邦爲  
念諄諄懇惻誠可爲有天下國家者之法何乃不踐其言報復  
至再平蓋書取其言而春秋責其事也

趙鵬飛經筵  
汪克寬纂疏

○孔子於

秦穆錄其悔過之辭於書以爲法著其窮兵之禍於春秋以爲

戒

鄭王  
闕疑

○秦誓穆公晚年悔過之書也左氏記秦晉之故甚詳

而不記作誓之事書序誤以爲敗殽還歸之作惟史記繫作誓  
於取王官封殽尸之後蓋穆公自是不復東兵矣

金履祥通  
鑑前編

○

日講解義說見書秦門○秦穆既有悔過之言而猶兩報敗  
殽之恥必濟河焚舟晉師不出而後忿洩志快非真能悔過者  
也文定以爲自此以後見伐不報始能踐自誓之言不知此後  
晉復報王官之役伐秦逾二年穆公卒使穆公而在未知其果

不報晉否也書終秦誓者夫子獨因詞之善而取其義耳汪氏  
以爲書取其言而春秋責其事者是也

張自起宗  
朱辨義

文四年秋晉侯伐秦

左圍祁新城以報王官之役○楚滅江晉之恥也王官之役與  
晉何損哉乃不致役於楚而亟事於秦失緩急之宜矣伐楚則  
大夫往伐秦則君行失輕重之衡矣

御纂  
直解

○胡傳於秦晉之

師曲爲之說而不可通皆因以稱爵爲寔稱人爲貶而不知宣  
以前君將稱君大夫將稱人也秦穆次年卒故不能報晉乃以  
見伐不報美秦誤矣

方苞  
直解

○秦蓄兩敗之怨一報王官未爲大

過文定泥於舉爵非貶謂以常情待晉襄而以王事責秦穆其  
說曲矣秦晉之怨兵連禍結罪實在晉且因競勝一時而失結  
秦攘楚之策非晉襄失計哉伐秦罪晉侯也

張自起宗朱辨義  
愚按書晉侯是

君將稱君若晉秦連兵之罪自見於事張氏洽以書晉侯爲罪  
晉侯而張氏自起困之謀也故剛節又晉襄之失在失楚而晉  
秦此則兩張氏所論皆得之或以報  
復無已爲晉侯罪亦尙未是要義  
○張氏洽說見比事門

文七年夏晉人及秦人戰于令狐

左晉襄公卒晉人欲立長君趙盾使先蔑士會逆公子雍于秦  
秦康公送之穆嬴日抱太子以啼於朝宣子患之乃背先蔑而  
立靈公敗秦師于令狐至于刳首先蔑奔秦○秦晉交兵於是  
再世自令狐後不悉書矣八年秦伐晉取武城十年晉伐秦取  
少梁不書陳傅良後傳○趙盾宜諭秦以中悔之故引愆請罪而所  
立者又卽秦之自出秦人亦意釋而師退矣師卽不退而嚴兵  
相拒久而不戰秦人深入晉地師老事變知必不能得志亦未  
有不全師以退者也師退則怨不成不敗則不思報而異日之  
患亦不深矣潛師夜起敗之令狐是何爲哉文定罪晉人之志

乎是戰者是已

張自超宗朱辨義

○殺戰之怨已終至此欲解仇結好

忽然中變棄玉帛之歡而構兵戈之禍殺戰以國故不得不然

此則出於強臣私意置君不定以大國之約立儲之重視同兒

戲七十年之兵連禍結皆趙盾開之

願棟高大事表

○秦晉始姻而終

讐其曲全在晉惠文皆秦所立文公納王陽樊之賜晉獨專之

城濮勝楚衛雍之策命晉又獨專之康公當屢戰之後承晉國

求君之使送公子雍而歸之誠是盛德事晉背秦而敗之甯我

負人所爲傾險於是累世積讐以終春秋

張尙瑗左傳折諸卷首

文八年

傳秦伐晉取武城以報令狐之役

文十年

傳春晉伐秦取少梁

秦晉再構怨而報復不已皆以其私也故不悉書

趙訪屬辭

又

夏秦伐晉

左秦伯伐晉取北徵。○傳載晉先伐秦而秦報之則當並書而曲直自見。今舍晉不書而獨書秦則傳未可信。鄭王闕疑○令狐曲在晉秦之報亦恆情也不書人師闕文耳。直解○秦伐晉以號舉先儒多以為罪秦孫氏覺謂易世相讐交兵不已故不稱其人。但曰秦以駟之彘纂亦云殺之役釁起自秦晉方伯之職不容已乃因是相讐連兵不已且結楚為援致楚日橫而中國做皆秦為之也。春秋是以罪秦也。殊不知殺之報復於文四年晉侯伐秦已是結案至七年逆公子雍於秦且曰秦大而近足以為援已是歡然一家忽然改圖以德為怨則秦之報復自不能已且秦之前後伐晉多矣皆不舉號彭衙之役且書秦師何獨於此狄之乎此蓋經文偶脫一人字與成三年鄭伐許昭十二年晉伐鮮虞同為闕文黃氏仲炎之說是也。顧棟高大事表

文十二年冬晉人秦人戰于河曲

左秦爲令狐之役故伐晉取羈馬晉趙盾禦之戰于河曲交綏

秦師夜遁復侵晉入瑕○自殺至此凡六交兵秦晉亟戰而楚

伯矣

卓爾康辨義

○殺之憾曲在秦令狐之戰曲在晉殺之憾未平

而令狐之怨再結咎實在晉

家鉉翁詳說

○范山言於楚子謂晉君

少不在諸侯北方可圖而秦晉亟戰於是楚君將稱君矣曰晉

人秦人戰于河曲畧之也

趙訪集傳

宣元年冬晉趙穿帥師侵崇

崇秦與國

左晉欲求成于秦趙穿曰我侵崇秦必救之吾以求成焉冬趙

穿侵崇秦弗與成○晉欲求成于秦發一介之使述先君之好

而秦成合矣侵崇則秦愈怒而兵不可解蓋穿志於作難託伐

崇以專兵也

家鉉翁詳說

○趙穿繆計豈有欲求成而反加兵其與

國者乎高閔集注○秦自穆公結楚不復東征二國之兵稍息已而

復生釁於令狐戰伐無已今晉方禦楚退而思求好於秦秦晉之交合則秦楚之好疎我無西顧之憂楚斷同讐之臂斯亦制

楚一大機也胡爲曲徇穿謀侵崇致怨自此一失明年卽有圍

焦之師至八年而晉師白狄伐秦十五年而秦人伐晉成九年

而秦人白狄伐晉十三年而晉厲合八國伐秦悼公旣伯秦數

出師以撓之我讐愈深彼交愈固至於吳師入郢秦哀公爲之

賦無衣楚眞得力於秦矣嚴駁隆傳註○秦晉自河曲之戰已結令

狐之怨今侵崇以挑之釁又開於晉矣顧棟高大事表

宣二年春秦師伐晉

左以報崇也遂圍焦○晉文之伯秦與有功晉霸之衰秦與有

罪城濮秦從晉以弱楚是故晉伯而楚衰自文十六年春秦黨

楚以滅庸而秦爲楚役楚方陵駕中國而秦復興師伐晉是故楚伯而晉衰楚莊通秦以軋晉晉方與楚爭則通秦以軋楚可也否則置秦勿問可也而盾之族子曰穿乃與侵崇之謀是起秦之爭也晉與楚爭乃爲秦做非自貽其戚耶呂大圭或問

宣八年夏晉師白狄伐秦

左白狄及晉平會晉伐秦○侵崇之曲在晉不知釋怨修睦乃復興師動衆會狄伐之直書而貶自見胡傳○侵崇起數七年未

已結狄伐秦晉罪大矣

李廉會通

○秦晉爭伐不已而荆楚彊盛之

勢成矣此下卽書楚人滅舒蓼比事以觀可見彙纂○秦晉兵

爭而楚得專意於北方此晉所以不支也

日講解義

○白狄與秦

同壤晉與爲婚而結以伐秦黨非類而事佳兵且晉已失伯今

黑壤之會諸侯方睦不思制楚而伐秦失計甚矣

御纂直解



宣十五年秋秦人伐晉

左秦桓公伐晉次于輔氏晉侯治兵于稷以畧狄土魏顆敗秦師於輔氏○秦復伐晉必楚人旣服鄭宋有力征中夏之心故使秦出師相牽制俾晉不暇南顧耳幸楚旅旋卒晉得以其閒推齊致宋尙能與楚相抗不然欲分齒不可得矣

日講  
解義

成九年冬秦人白狄伐晉

左諸侯貳故也○秦楚交合同心謀晉楚伐莒以撓其東秦狄攻其西使晉力不能支

日講  
解義

○晉前連白狄伐秦秦久不報

君子多秦桓也越二十年亦連白狄伐晉桓德不終矣此其所以致十三年之伐歟

張自起宗  
朱辨義

成十一年

傳秦晉爲成將會于令狐秦伯不肯涉河使史黶盟晉侯于河東晉卻擊盟秦伯于河西秦伯歸而背晉成

九年秦與狄伐晉晉不報而更與秦爲成則前侵崇之怨又結

至此秦伯不肯涉河歸而背晉成是釁又開自秦也顧棟高大事表

成十三年夏晉侯帥八國之師伐秦

左晉侯使呂相絕秦秦桓公既與晉厲公爲令狐之盟又召狄與楚欲道以伐晉諸侯是以睦於晉五月晉師以諸侯之師及秦師戰于麻隧秦師敗績○秦晉不和久矣十一年始有爲成之舉而旋絕之自是終春秋無復合之理夫與晉抗衡中原者楚也非秦也晉不能攘楚而於暱近之秦亟絕之使秦與楚反有日親之勢是以秦委楚也故唐荆川曰晉之仇秦非特生一強敵又借盜以兵也此天下之勢一大變也趙佑雜案

襄九年

傳秦人侵晉晉餒不能報也○趙訪曰不書淺事不足書

襄十年夏晉師伐秦

左荀罃伐秦報其侵也○家氏說見比事門○晉方圖楚不思

樹秦以爲援而反構秦以資敵非計也

日講  
解義

○楚通秦倚晉

與晉通吳倚楚其計同也晉知吳楚相蔽爲己利乃與秦相蔽

以利楚計亦左矣

御纂  
直解

○晉悼之世秦怨未結卽據左氏去

年秦師之侵亦於晉無損動衆挑釁互相報復致起十三國之

師而卒未有成功晉悼之失多矣

張自超宗  
朱辨義

襄十一年冬秦人伐晉

左秦庶長鮑庶長武帥師伐晉以救鄭戰于櫟晉師敗績○秦

與楚婚於是爲楚伐晉報十年之伐敗晉於櫟不書晉不告也

日講  
解義

○九年傳言秦人侵晉是時秦景公妹爲楚共王夫人

蓋晉通吳以制楚楚亦援秦以倚晉耳

方苞  
直解

襄十二年

傳楚子囊秦庶長無地伐宋以報晉之取鄭

是時秦結楚以猾夏罪在秦

顧棟高  
大事表

襄十四年夏晉侯帥十二國之師伐秦

左諸侯之大夫從晉伐秦報櫟之役晉侯待于竟使六卿帥諸侯之師以進及涇不濟叔向見叔孫穆子穆子賦匏有苦葉叔向退而具舟魯人莒人先濟鄭子驥衛北宮懿子見諸侯之師而勸之濟濟涇而次子驥帥鄭師以進師皆從之至於械林不獲成焉秦不服苟偃令曰雞鳴而駕塞井夷竈惟余馬首是瞻櫟

歷曰余馬首欲東乃歸下軍從之乃命大還晉人謂之還延之役○秦晉七十年兵爭讎兆於圍鄭怨結於敗穀禍稔於三戰大舉於九國之伐而終於此役以十三國重兵壓境而師出無律將各異心徒以煩民功積蔑有皆悼公之怠致諸臣之專也汪克寬纂疏○是役晉以軍帥不和全軍無咎秦見晉之方彊諸侯多助不敢出師自此晉秦息兵終春秋之世使偃當日忿氣進

師敗固致悔卽幸而勝秦必報晉戰爭何時已哉

應瑒謙集解  
凌嘉印注

秦晉自僖三十三年爲穀之師至此歷六十九年中間凡四大案穀

戰爲穆公襲鄭曲在秦令狐爲趙盾距公子雍曲在晉侵崇爲趙宣

設謀求成曲復在晉麻隧爲秦桓背令狐之盟曲復在秦

顧棟高  
大事表

襄二十五年 傳秦晉爲成大夫交相泄盟成而不結

襄二十六年 傳秦伯之弟鍼如晉脩成

○齊晉交兵 詳伐盟主書次辨

攷齊晉兵交之由而知兩強不相立也齊桓子孫不足繼伯每不平  
於晉晉文子孫雖號爲繼伯而亦不敢責備於齊齊桓伯業南伐強  
楚北伐山戎西會葵邱東會于淮經營天下略徧獨晉人盟會不及  
遊晉之強也孝公衛取穀之怨合晉師以卻楚豈料城濮一勝晉伯  
遂成踐土翟泉兩會借來齊必有勉強不獲已者自後晉人大盟會

齊君大夫不復從者四十有六年齊人虐辱我叔姬憑陵我西鄙魯人兩告於晉晉不一問於齊晉之視齊猶昔日齊之視晉也齊惠結魯以抗晉魯宣舍晉而親齊至於卻克使齊齊桓之憾始開斷道一盟齊魯之交始散一笑與師齊以師徒撓敗之餘俯首帖耳於蟲平馬陵之盟自是以後龜勉聽命豈其本心戚之會以國佐至虛杓之役以崔杼會悼公五會三駕諸侯親往齊獨以世子當之蓋其平日憤憤不平之心以勢力不至不得不來耳悼公末年伯心稍倦則有我北鄙之伐及平公時君伐我而圍桃臣伐我而圍防非以弱魯正以陵晉平公合十二諸侯環其城下而攻之經書同圍著齊環不道之罪也繼是澶淵商任沙隨等會莊公又親辱矣然以勢力強大之齊而役役於地醜德齊之晉豈甘心哉沙隨之明年伐晉以報東門之役入孟門登太行張武軍于熒庭修怨之志始快矣春秋自非秦

晉世讎誰敢執戈而與晉爭晉人曰晉楚齊秦匹也楚人曰釋齊秦他國請相見宋之盟戰國之兆也景公如晉飲酒投壺晉人已有齊君弱吾君之言至召陵侵楚以後諸侯相顧莫敢先叛齊首與鄭衛盟與魯會又次于五氏垂葭以伐晉而諸侯遂無伯矣晉國將分莫適爲主至哀十年趙鞅始侵齊以報之亦足見晉公室大弱矣且夫晉文之盛不及齊桓後世子孫惟悼公有聲績其餘齊晉數君不大相遠晉獨得以世伯者由於欒卻胥原狐續慶伯韓范趙魏之徒人才世出支持伯業與春秋終始桓有管仲而無繼所以無世伯之資景有晏子而不用所以無復伯之績孰謂伯業區區可無人爲之乎

陳則通  
提綱

前乎齊桓中國無霸桓創而晉襲之忿伎生而思復其故孝公爭之頃公靈公莊公爭之景公繼爭之至於悼簡之衰爭猶未已爭之而

卒不得其不敵者不在諸侯之從違而在中國之不靖夫齊而有勿忘先業之志無亦輯甯爾兄弟綏撫爾臣民待晉之衰布恩信於天下不此之務而唯力是爭晉方世紹其業日與諸侯周旋拒楚而懷忿恃以爭之其危辱也不亦宜乎景公承晉之敝而修鄭陵之盟急沙鹹牽洮之好然不足以生諸侯之敬忌而且君移柄於權臣父偏私於愛子齊遂終失其霸

王介之四傳  
質宣十五年

齊晉兩國相爲強弱晉強則齊同諸侯以附晉晉弱則齊合諸侯以自強魯衛諸國則視齊晉盛衰而爲向背者也攷之春秋自襄二十九年至定七年晉之勢未弱於齊是後晉國既弱故齊易晉而敢與抗獨魯衛宋鄭皆舍晉適齊矣

沈棻  
比事

僖九年傳曰齊侯以諸侯之師伐晉及高粱而還討晉亂也獻公卒矣齊立齊桓苟能正其奪嫡之罪取驪姬笑齊誅之迎立重耳晉國



數世之亂消於一旦賢於甯母之拒于華快於首止之定世子也乃桓既倦勤仲亦無志何所聞而來何所見而去傳曰討晉亂蓋深惜其不能討也

姜炳璋讀左補義

宣十八年春晉侯衛世子臧伐齊

左晉侯衛太子臧伐齊至於陽穀齊侯會晉侯盟于繒以公子彊爲質於晉晉師還蔡朝南郭偃逃歸○晉文公卒齊不從晉

盟晉是以不競於楚晉不得齊諸侯不附晉景爲斷道之會徵

會於齊而齊不至於是伐齊彙纂趙孟何○齊自翟泉以來不與晉

之會盟恃其强大侵暴小國晉景欲振奕世之伯業始則君率

衛以伐齊既而卿偕魯衛曹以戰齊汪克寬莫訛○晉既失宋諸侯

從者惟魯衛曹邾而已前日斷道之盟是也懼不足以抗楚宋

陳蔡鄭既已入楚中國諸侯大者齊秦而秦於晉世仇不可致

故欲得齊以壯中國之勢

趙鵬飛經筵

○齊霸國之餘晉文資其力

以敗楚自文公卒齊不復從晉盟至是徵會而齊不與毅然親

將伐之實得繼霸之義韋之戰雖曰逞忿然自是齊服而東諸

侯無貳心無會不與無役不從與楚相抗者近百年不可謂非

謀國之善也

日講解義

成二年季孫行父

等四卿

會晉卻克

等三大夫

及齊侯戰于鞏齊

師敗績齊侯使國佐如師及國佐盟于袁婁

左孫桓子臧宣叔如晉乞師

春齊伐我取龍夏衛侵齊戰敗于新築

皆主卻獻子

獻子請八百乘許之以救魯衛臧宣叔逆晉師且道之季文子

帥師會之師從齊師于莘六月壬申師至于靡笄之下齊侯請

戰癸酉師陳于鞏齊師敗績逐之三周華不注晉師從齊師入

自邱輿擊馬陘齊侯使賓媚人致賂晉人不可魯衛諫晉人許

之○齊自袁婁以後追悼公之終歷三十餘載無會之不同無  
役之不與則窳之戰有以挫其氣而摧其強耳

汪克寬纂疏

○卻克

之答齊師一則曰大國朝夕釋憾於魯衛再則曰寡君使羣臣  
爲魯衛請知是役以二國見侵之故也二傳增飾一笑之忿妄

說也

王樵輯傳

○彙纂案窳之戰說者多以爲忿兵然晉得齊而伯

業實賴以不墜也詳見晉楚爭盟門

左秋七月晉師及齊國佐盟于袁婁使齊人歸我汶陽之田○  
公羊曷爲不盟于師而盟于袁婁窳之戰齊師大敗齊侯使國  
佐如師卻克曰與我紀侯之獻反魯衛之侵地使耕者東畝且  
以蕭同姪子爲質則吾舍子矣國佐曰紀侯之獻魯衛之地請  
諾使耕者東畝是則土齊也蕭同姪子者齊君之母也不可請  
戰一戰不勝請再再戰不勝請三三戰不勝則齊國盡子之有

也何必以蕭同姪子爲質揖而去之卻克跌魯衛之使使以其辭而爲之請然後許之逮于袁婁而與之盟

何休注逮及也反及國住于袁婁也

○穀梁鞏去國五百里袁婁去國五十里一戰絳地五百里焚雍門之茨侵車東至海君子曰齊有以取之也○諸說見盟于師書及門○齊侯恃其強以伐人及其窮蹙則使重臣求免四國大夫專兵雪忿得一勝則逞無窮之欲二者皆失也

程端學本義

襄十八年冬公會首侯

等十一國諸侯

同圍齊

左秋齊侯伐我北鄙晉侯伐齊冬十月會於魯濟尋淠梁之言同伐齊齊侯禦諸平陰塹防門而守之廣里夙沙衛曰不能戰莫如守險弗聽諸侯之士門焉齊人多死范宣子告析文子曰魯人莒人皆請以車千乘自其鄉入若入君必失國子家以告公公恐齊侯登巫山以望晉師晉侯使司馬斥山澤之險雖所

不至必施而疏陳之使乘車者左賁右僞以旆先與曳柴而從之齊侯見之畏其衆也乃脫歸丙寅晦齊師夜遁十一月丁卯朔入平陰遂從齊師魯衛請攻險己卯荀偃士句以中軍克京

茲乙酉魏絳欒盈以下軍克邾趙武韓起以上軍圍盧弗克十

二月戊戌及秦周伐雍門之萩己亥焚雍門及西郭南郭劉難士弱率諸侯之師焚申池之竹木壬寅焚東郭北郭范鞅門於

揚門州綽門於東閭甲辰東侵及濰南及沂○書同圍見諸侯

之惡齊程子經說○侵伐圍入未有書同者獨於此書同圍何也齊

環背盟棄好數伐鄰國諸侯共疾故同圍之春秋於此有阻橫

逆抑強暴之意胡傳○齊環虐鄰殘民四年之中至於六伐鄙而

四圍邑不道之甚晉討得其罪從衆欲而非爲其私故書同王

輒○鞏之戰止於敗齊師而致賂求和君親朝晉能服齊也平

陰之戰師至城下齊君卻走而終不下晉此見晉霸之衰

呂祖謙左

傳說○莒邾嘗病魯滕薛小邾嘗屬齊今圍齊莫敢不同者晉以

大義驅之也

鄭玉明疑

○此義戰之善者也齊自頃公袁婁受盟恪

從霸令靈公從晉景伐鄭者一從晉厲伐秦者一伐鄭者三從

晉悼伐鄭者四沙隨柯陵雞澤齊侯未嘗不親至也于戚于戲

于粗于亳北于蕭魚世子光未嘗不同盟也盧打邢邱諸會卿

大夫未嘗不馳驅也齊晉匹敵惟期同欲故雖雞澤以來公不

親至以世子而長國君自悼公之會始越禮而躋不問周班晉

之於齊何其恭哉乃俄而搆魯魯國不恤同盟四年之間六伐

其鄙四圍其邑蓋是時晉悼卒矣中國無霸齊環棄好自逞諸

侯共疾於是徵會致討列國景從沈璧誓河大義昭著故春秋

侵伐圍入未嘗書同獨此書同明其爲天下之公惡也

馬融左傳事緯

襄十九年秋晉士匄帥師侵齊至穀聞齊侯卒乃還

左聞喪而還禮也

襄二十三年秋齊侯伐衛遂伐晉

左齊侯伐衛將遂伐晉晏平仲曰君恃勇力以伐盟主若不濟國之福也不德而有功憂必及君齊侯遂伐晉取朝歌爲二隊入孟門登太行張武軍於熒庭戍鄆邵封少水以報平陰之役乃還趙勝帥東陽之師追之獲晏釐○書遂伐以著齊之惡亦見晉無政有以召齊之侮也欒盈無罪范氏以私憾譖逐之爲兩會錮之齊光觀其政亂有所侮而動也然輔臣以敵君名不正言不順豈惟不能有濟禍對踵之矣家鉉翁詳說○齊爲平陰之役欲報晉而未有間故陰納盈以亂其國因乘亂伐之度晉方內難力有所不能及也日講解義○書欒盈奔楚不書欒盈自楚

奔齊盈之入晉不書自齊入于晉何以知齊之黨欒盈也於盈入晉入曲沃之後書齊侯伐衛遂伐晉知之也然則春秋罪齊之黨叛臣矣何不詳書以罪之蓋齊實非爲欒盈也齊怨魯之不事齊而事晉因以怨晉之庇魯而加兵於齊屈於不得已強與盟會未嘗不欲乘機弱晉盈之黨猶足以亂晉故助之入曲沃俾爲亂於內而外以兵臨之可以得志於是伐衛而晉果不救伐晉而晉果不出明年晉會夷儀而果不敢報使齊莊不見弑晉齊之勝負固未可知也使春秋書欒盈之奔齊書盈之自齊入晉不幾使人疑齊之實黨欒盈哉然則不卽伐晉而先伐衛何也魯之背齊向晉衛居其間衛又嘗奉晉命伐齊故先伐之以試晉晉不救衛而乃乘勢以伐晉也書遂者著齊之本謀在晉也

張自超宗  
朱辨義

○陳氏說見書遂門顧氏說見晉楚爭盟門



襄二十四年秋公會晉侯等十一國諸侯于夷儀

左將以伐齊水不克○自盟柯陵後齊有輕晉之心會齊侯環卒而光新立乃受盟澶淵及商任沙隨之會晉失其令齊復貳

伐衛遂伐晉又再加兵于莒故晉會夷儀將以討齊然會而不

伐是有畏也國勢不競衆志不一也曰水不克者以此爲辭爾

高閏集注○晉欲伐齊而不能伐大合十二國之君而無所事蓋進

則憚齊之強退又憂楚之伐鄭是以一會而徒返耳汪克寬纂疏

襄二十五年夏公會晉侯等十一國諸侯于夷儀 秋諸侯同盟

于重邱

杜注謂伐齊書同盟明齊亦與盟非也使齊果同盟當特書諸侯及齊盟以著其失賊列姦之罪矣據經會不書伐齊而同盟書諸侯乃中有間事之恒辭蓋晉許齊成而齊亂未定崔杼亦

不敢自行未嘗出受盟爾

日講

○餘見晉楚爭盟門

定九年秋齊侯衛侯次于五氏

左傳見書次門○不書伐者以次告

杜注

○書次者晉實大國未

敢輕伐始盟于沙又次于五氏又次于垂葭又次于藁蔭至哀

元年而後伐其欲有所逞也久矣

張洽集注引任公輔

○如左氏言則齊

乃伐晉不得以次書且衛與齊同次未見救齊之功齊敗之後

乃致三邑於衛必無之理伐晉致邑經所不見皆不足據

程端學三

傳辨

○不書伐而書次蓋二國雖有玩晉之心而晉勢尙彊聊

次五氏以觀其費實未敢伐也

日講

○愚按諸說以爲未伐

是也杜注謂諱伐盟主陳止齋謂春秋重絕晉不書伐皆去是

定十三年春齊侯衛侯次于垂葭

左齊侯衛侯次于垂葭使師伐晉○書次垂葭與五氏同

高閔業注

定十五年夏齊侯衛侯次于渠蔭

五氏垂葭之次皆爲謀晉至是復出兵觀望而明年遂有伐晉之舉左氏以爲救宋非也鄭從齊方堅齊得衛得魯皆鄭謀之最後宋始附齊其交未久齊不應救宋以仇鄭且鄭非彊國合齊衛以敵之亦何懼而不果哉

日諱解義

哀元年秋齊侯衛侯伐晉

左救范氏也取棘蒲○前此五氏之次伐夷儀垂葭之次伐河內蓋皆遣偏師伐晉而二君次止以觀其可攻與否實未嘗親帥師以攻晉也今書伐晉著霸統之絕受諸侯之兵且誅齊衛之黨叛臣而陵霸國也

王克寬纂疏

○齊侯謀晉久矣屢次而未成

伐今晉臣从叛齊衛遂助叛以伐晉書以病晉之不能定叛罪齊衛之黨叛也

御纂直解

○趙鞅殺邯鄲午後午之子趙稷黨范

中行據邯鄲以叛齊侯衛侯助邯鄲圍五鹿至是重興師毛奇

哀十年夏晉趙鞅帥師侵齊

左趙鞅伐齊取犁及軔毀高唐之郭侵及賴而還○吳遭齊喪

而去之晉乘齊喪而伐之曾吳之不若也吳漢纂言

○吳楚交兵書爵書人衰貶辨書人書國衰貶辨 雞父不書楚貶詞辨 柏舉書蔡以師襄詞辨

吳自成七年見經伐郟入州來勢與楚偏楚慮其梗三伐之襄三年十四年

二十四年吳子遏憤而報伐門于巢卒襄二至於楚靈又三伐之昭四是

時楚方合諸侯而吳之兵威未甚揚於中國故吳雖屢受楚伐未遑

報復及昭十三年滅州來二十四年滅巢楚勢已衰吳始擅強中國

二十三年書吳敗頓胡沈蔡陳許之師于雞父是時楚之伐吳惟定

二年一見於經而吳以四年又敗楚於柏舉入郢楚幾亡國向之大

伐吳蓋不償柏舉之一戰也自是終春秋楚不敢爭無伐吳之文而

晉頃以後晉衰已甚楚不乘其勢殘暴諸侯者有吳爲敵也

沈氏此事

句吳之大自壽夢始伐邾始見於經是秋復入州來一歲兵再見騶疆也晉之會吳以病楚也當日能與楚敵者唯晉與秦齊齊既攜貳秦自殺帥以後棄晉與楚合楚獲疆助晉勢漸孤雖鄢陵新勝終不能服厲悼之際晉欲一舉而誅楚勢不能也吳居其肘腋之下壽夢方銳巫臣啟謀伐其附庸撓之奔命楚師未出則擾其旁出則議其後楚人畏備無暇北視此以夷制夷因時濟變之權衡也

馬驥左傳事緯

壽夢之世吳能自彊旣而巢隕諸樊閭戕戴吳楚康之際吳其衰乎夷昧立而楚靈方驕入朱方執齊慶封三年之內三尋師焉楚暴吳弱宜若不敵乃平王初立吳卽乘隙而滅州來吳固非甘心下楚者也王僚之立長岸一戰而師歷楚境雞父再役而七國喪敗楚常誦而吳常仰豈王僚之能度越前人哉史記稱平王初立施惠百姓存

池國中傳亦稱簡兵息民然密邇讒間喪厥太子並誅伍奢幸而令終保無患乎昭王初立吳僚被弑楚人欲因吳亂而取之不知闕廬之發憤爲雄遠逾前代而楚昭信譖寵佞猶然平王之子也吳人一舉而滅徐再舉而伐越旣而楚瓦貪賄闔廬內因胥詬之怨外因唐蔡之讐用孫武白喜之師長驅入郢五戰皆勝昭王出走較之召陵之盟城濮之戰功尤加烈晉不能伐授權於吳聖人惜焉又

甚矣晉之以計中吳也始則教吳叛楚而通其交終則俟楚釁吳而絕其好甚矣吳之以計中楚也始則攻楚與國而令其疲終則去楚與國而令其孤我宣公八年楚人疆舒參盟吳越吳爲楚役舊矣吳未始叛楚也而教之叛楚吳未知戰陳也而教之戰陳吳未嘗會諸侯也而誘之會諸侯晉方謀鄭楚驟爭之念諸侯莫可以制楚獨吳居肘腋能爲楚患州來之入吳始挑怨於楚鳩茲之克楚復結讐於

吳相持莫下晉遂得從容服鄭而楚不敢爭蕭魚以後楚方忿吳不復問鄭晉已得鄭不復恃吳昔也招而進之今也麾而置之晉之謀國者殆曰吳日有事於楚若楚伐吳吳請師以救吾能與師數千里以救之乎若吳伐楚吳請糧以濟吾能告糴諸侯以予之乎從之疲於奔命不從易以生怨不如因其伐楚喪而退之不然無瑕可以錄人襄之二年晉伐鄭喪尙何責於吳哉此吳人墮晉人計中也孰料楚又墮吳之計也楚無陳蔡鄭許不能抗衡北方無荊州羣蠻不能自保其國隨人叛則不得志於漢東庸濮叛則申息北門不啟吳一旦伐巢伐徐又入州來楚之右臂幾斷一伐以子重襄三再伐以子襄四東奔西救不得息肩子囊將死凜然有朝夕及郢之憂然猶大夫奔命也襄二十四年楚子伐吳無功吳自此有輕楚之志二十五年吳子攻巢而殪吳自此有不共戴天之讐楚靈怙其強暴至大

合諸侯以有事于吳大而若陳蔡許小而胡沈頓夷之屬疾驟而戰之明年又驅徐越而來卒不得志而去又明年遠罷有房鍾之敗楚人罷勞轉徙卒不能堪熊居以來吳張益甚向者伐巢今遂滅巢向者伐徐今遂滅徐向入州來今遂滅州來而楚之藩籬空矣一戰長岸而楚敗再戰雞父而六國敗楚之黨與盡矣吳且用伍員之計多方以誤楚柏舉之役遂入郢吳方在楚越又入吳越之仇吳楚實使之楚靈伐吳則越大夫常壽過會其役舟師略吳疆則越大夫胥犇出勞王昭之三十二年吳始以伐越書定之五年越始以入吳告句踐歸玉帛於吳歸臣妾於吳如豢牲牢俟日而用之黃池之爭未已越已輕兵間道造其國都此又非越之以計中吳邪吳以計中楚越又以計中之吳以力勝楚越又以力勝之春秋書於越入吳於柏舉之後再書於越入吳於黃池之後好兵亟戰者宜鑒此矣

陳則通  
提綱



晉以吳敵楚楚乃復以越敵吳迨吳越相并楚復兼并之而益大春

秋之楚遂爲戰國之楚矣

王樵  
輯傳

晉通吳亦制楚善策然不能自彊於政治楚雖敵吳亦爭雄

日講  
解義成

年七

吳入春秋嘗服屬於楚至壽夢而遂不可制此申公巫臣教之也考左氏知吳地水行其性不能以陸故其會晉也于蒲則不能至于鍾離而後至于雞澤則不能至于戚而後至晉徵平邱之會吳以水道不可辭哀九年敵師伐齊則先溝通江淮矣十三年會晉黃池則闕爲深溝于商魯之間矣是知吳之利在舟楫也然以此與楚角則不能勝何也長江之險吳楚所共楚居上流故吳之用兵嘗棄舟楫之用而爭車乘之利考其前後數百戰鳩茲之役楚勝而吳之報之也取駕茅方之役楚勝而吳之報之也取棘櫟麻蓋舍其習用之技而

嘗從陸路瞰之當其舍舟淮汭自豫章與楚夾漢也贏糧越險深入內地轉戰千里自非熟練車乘不能爲用向非巫臣教以乘車射御則楚舟師自漢口順流而下譬如屋上建瓴水注之地而吳以舟師仰攻勢必不勝向之甘於役屬者職是故耳古之善戰者因地制宜隨時適變吳舍舟用車而卒破楚晉毀車用卒而能勝狄

顧棟高大事表

宣八年夏楚人滅舒蓼

左楚伐舒蓼滅之疆之及滑汭盟吳越而還。如傳所載是時

吳越與舒絞州蓼相似耳至巫臣教吳而始大

呂祖謙左傳說

○是時

吳越俱聽命於楚楚所以橫行不可制晉用吳制楚所謂使蠻夷內自相攻吾乃可以乘其間也

顧棟高大事表

○又案楚莊爭伯首

先滅庸庸滅而楚西北之患息矣次盟吳越吳越就盟而楚東南之隙彌矣根本既固然後與強晉爭鋒此孫叔敖之謀也

又

成七年春吳伐郟

楚初主盟于蜀而吳已伐郟入州來異時入郢之禍已兆於此

汪克寬纂疏

○此志吳敵楚之始

張自超宗朱辨義

又

秋吳八州來

按劉氏敵孫氏後諸說小國也左以爲楚邑非也蓋楚與國也

左楚申公巫臣奔晉請使於吳吳子壽夢說之乃通吳於晉教

吳乘車教之戰陳教之叛楚吳始伐楚伐巢伐徐馬陵之會吳

入州來蠻夷屬於楚者吳盡取之是以始大通吳於上國○吳

楚交兵不書

據傳伐楚伐巢伐徐于重七奔命

至是始書之始大而通上國入

州來不可不錄其始也

陳康良後傳

○州來迤南而西則楚吳得州

來可以窺楚楚控州來可以禦吳吳楚之扼吭也

嚴駱陸傳注

○林

之奇曰楚人禦吳以江故用舟師吳人撓楚以淮故用車戰吳

伐巢伐徐淮西也入州來淮北也吳楚爭淮自此始自雞父敗

而吳得入州來滅巢及鍾離矣是則亡郢始於入淮朱鶴齡註左日鈔

成十七年冬楚人滅舒庸傳載吳圍巢

左舒庸人以楚師敗去年敗道吳人圍巢伐駕圍釐虺楚襲舒

庸滅之

襄三年春楚公子嬰齊帥師伐吳書楚伐吳七始於此

左楚子重伐吳克鳩茲至於衡山使鄧廖帥組甲三百被練三

千以侵吳吳人要而擊之獲鄧廖子重歸吳人伐楚取駕○楚

自鄢陵之敗其勢稍屈畏吳乘其間也故先伐吳以張其勢高

集注○夷狄相攻中國之福也使吳楚合而從事於中國何以禦

之晉厲率諸侯大夫會之於鍾離一會而吳無仇晉之心楚有

忌吳之意故楚伐吳以其不與已而與中國也楚之兵力既分

於吳不能專向中國諸侯之患得以少紓吳既受楚兵則亦不

能無求於中國故五年成之會吳不召而至吳附中國則楚孤終春秋之世楚無一日安枕者吳倚其東也

趙鵬飛

○鳩茲爲

今之蕪湖此楚從水道勝吳也而吳之報楚取駕駕在今無爲州境則從陸道蓋吳楚共長江之險而吳居楚下流仰攻難勝故吳之用兵嘗從淮右北道前此巫臣未通吳以前吳不諳乘車之法不能陸戰故入春秋踰百年嘗役屬於楚至此乃得射御長技與楚角逐中原平地楚既失長江之險不得不堵截淮路以塞吳北來之衝至州來失

按州來杜注淮南下蔡在今壽州北

而人郢之禍

兆矣此吳楚用兵之大略也

顧棟高

○此書吳楚交兵之始秦

楚合而中國勞吳楚爭而中國息然則吳楚相爭誠中國之利哉然既屢與吳會則宜合謀併力以弱楚而又與楚爲交見之盟是但爲偷安旦夕之計而非有強中國之長策也使中國諸

侯因吳楚構兵及其休息之時崇禮義而靖于戈中國日強則

吳楚罷於戰鬪請服不暇矣惜哉

張自超宗  
朱辨義

襄十三年秋楚子審卒

傳載吳侵楚

左吳侵楚養由基奔命于庚以師繼之養叔曰吳乘我喪謂我不能師也必易我而不戒子爲三覆以待我我請誘之子庚從之戰于庸浦大敗吳師

襄十四年秋楚公子貞帥師伐吳

左楚爲庸浦之役故子囊帥于棠以伐吳吳不出而還子囊敗以吳爲不能而弗傲吳人自臯舟之隘要而擊之大敗楚師○楚不得志於北方吳爲之梗也故楚康卽位置宋鄭不問而首

伐吳伐而未得志故二十四年復親伐之其讐吳深矣

趙麟飛  
經筵

○傳載是年冬子囊卒遺言必城郢則吳爲楚患迫矣

日講  
解義

襄二十四年夏楚子伐吳

左楚子爲舟師以伐吳不爲軍政無功而還。○楚三伐吳矣襄

三年以附晉也十四年以助晉也今晉吳不交十年矣何以伐

吳晉伯既衰楚將復事諸侯故先制吳也前兩伐皆命將此則

自將御○吳楚相攻可以不書書楚子伐吳者錄吳楚之

構兵以著荆蠻之所以息患於中國也張自超宗朱辨義

襄二十五年秋楚屈建帥師滅舒鳩

左吳爲楚舟師之役故召舒鳩人舒鳩人叛楚令尹子木伐之

吳救之及離城大敗吳師遂圍舒鳩舒鳩潰八月滅之

又冬吳子遏伐楚門于巢卒

左吳子伐楚報舟師之役門于巢巢牛臣射之卒。○自入州來

至是而書伐楚略之也陳傳曰後傳○吳伐楚必徑巢巢爲楚捍吳

必下巢乃可向楚故先攻之門于者攻其門也士匄門于鄆門

公門于陽州皆攻之也不言伐巢不爲巢興兵也

王夫之

襄二十六年

傳楚子秦人侵吳及雩婁聞吳有備而還

昭四年秋楚子蔡侯陳侯許男頓子胡子沈子淮夷伐吳

左楚子以諸侯伐吳使屈申圍朱方克之。楚昔之所仇者在

晉今晉旣遜之爲盟主則所仇者吳耳故一出而執徐子者以

徐子爲吳之出也伐吳而殺慶封以慶封吳所封也而又滅賴

亦以示威於吳也

黃震曰鈔

○淮夷亦至者以東諸侯由淮通吳而

徐頓胡沈居淮上流亦要地也故併與之會以斷吳通中國之

道皆所以爲伐吳計

李本私考

又

傳冬吳伐楚入棘樛麻以報朱方之役

昭五年冬楚子蔡侯陳侯許男頓子沈子徐人越人伐吳



左楚子以諸侯及東夷伐吳報棘旄麻之役蓬射以師會于夏  
泖越大夫常壽過帥師會楚子于瑣聞吳師出蓬啟疆帥師從  
之蓬不設備吳人敗諸鵠岸蓬射之師先入南懷楚師從之及  
汝清吳不可入是行也吳早設備楚無功而還○吳自襄十四  
年至是四受楚兵其間惟吳過伐楚而卒於道實未有以報楚  
也而楚兵無歲不行於吳境吳非怯也養鋒戢銳以坐敵楚師  
州來之滅長岸雞父之兵漸奮起焉至柏舉之役遂一戰及郢  
僚與闔閭之謀深矣彙纂趙鵬飛季本○此楚通越制吳之始李廉會通

昭六年秋楚蓬罷帥師伐吳

左楚子使蓬洩伐徐吳救之令尹子蕩伐吳吳敗其師于房鍾  
子蕩歸罪於蓬洩而殺之○三書伐吳見楚終不得志於吳也

高閭集注

○楚兩以諸侯之師伐吳所以誇諸侯之從己以示威於

吳也而卒不能得志於吳故復使蘧罷專師伐之

張自超宗朱辨義

昭十二年冬楚子伐徐

左楚子狩于州來次于楨尾圍徐以懼吳楚子次于乾谿以爲之援十三年夏楚子弑于乾谿楚師還自徐吳人敗諸豫章○

徐吳之姻國楚疾吳故遷怒於徐旣執其君又伐其國

高問集注

昭十三年冬吳滅州來

左吳滅州來令尹子旗請伐吳王弗許曰吾未撫民人而用民力敗不可悔州來在吳猶在楚也子姑待之○州來近楚小國

吳楚中間要害處成七年吳入之今又殘毀之其地卒歸於楚

吳不能有也十九年傳楚城州來見吳之不能有也

葉繁王葆家乾翁

昭十七年冬楚人及吳戰于長岸

左吳伐楚陽句爲令尹戰于長岸大敗吳師獲其乘舟餘皇○

長岸之戰不言敗勝負敵也楚地五千里帶甲數十萬戰勝諸侯咸服天下卒非吳敵也惟不能去讒賤貨使費無極以讒勝喪瓦以貨行而策士奇才爲敵國用故日以侵削至雞父之師七國皆敗柏舉之戰國破君奔幾於亡滅吳日益強而楚削矣胡傳○五年吳嘗敗楚於鵲岸不書六年敗楚於房鍾不書書伐吳而已於是始書戰則以吳楚敵言之陳傅良後傳○不書吳伐楚長岸在今太平府當塗縣邇吳遠楚敵未至而迎之也高樹然釋經○楚稱人吳舉國從略之辭非進楚以外吳也楚之稱爵稱大夫已久此而稱人者以其與吳戰無關於中國之故故略之也吳亦曾稱人矣此而舉國者以其與楚戰無關於中國之故故略之也既無關於中國之故可以不書而亦書戰書地者以著吳自此而強楚自此而弱中國所以得息楚患而吳漸有陵駕中

國之勢也

張自超宗朱辨義

○春秋不以楚及晉外之也何為以楚及

吳皆外也有大小焉

郝懿行說略

昭十九年

傳楚人城州來沈尹戌曰楚人必敗城州來以挑吳能無敗乎

昭二十三年秋吳敗頓胡沈蔡陳許之師于雞父

左吳伐州來楚遠越帥師及諸侯奔命救州來吳人禦諸鍾離公子光請分師先犯胡沈與陳必先奔三國敗諸侯之師乃搖心矣諸侯乖亂楚必大奔從之戰于雞父三國敗獲胡沈之君及陳大夫舍胡沈之囚使奔許與蔡頓曰吾君死矣師謀而從之三國奔楚師大奔○吳師先犯胡沈陳後破許蔡頓六國敗奔楚師大奔是六國敗後楚師怖懼不得成陳望風而奔故傳云不言戰楚未陳也服虔云楚諱敗不告故不書劉炫從之非也

疏

○令尹既喪楚師已熠六國先敗楚師遂奔楚師未與吳

接故不書楚

胡傳汪克寬纂疏

○以傳考之吳人禦楚師于鍾離而六

國敗于雞父其地自不同當是子瑕卒楚師止于鍾離不進吳

獨與六國戰于雞父楚實不與故不書

葉夢得左傳識

○楚師大奔而

經不書何也吳敗諸國而楚則全師而退也以傳考之蓋楚令

尹死師燬羣帥爭寵邀功故迫諸國共出陣而心實畏吳故陣

而不戰是以諸國敗奔楚轉得全師以遁若書吳敗楚頓胡沈

蔡陳許之師則似楚人主戰諸國從之而非其實矣

方苞直解○州

來始爲吳有楚之藩籬撤而入郢之禍兆矣

顧棟高大事表

○愚按不

書楚胡汪葉方說是家氏謂不與六國之從楚非也

昭二十三年

傳楚囊瓦城郢沈尹戌日子常必亡郢杜註畏吳也

昭二十四年冬吳滅巢

左楚子爲舟師以略吳疆吳人踵楚而邊人不備遂滅巢及鍾

雖沈尹戌曰王一動而亡二姓之帥幾如是而不及郢。書吳入州來著陵楚之漸書吳滅巢著入郢之漸四鄰封境之守既不能制則封境震矣四境國都之守既不能保則國都危矣故

沈尹戌以爲亡郢之始

胡傳

○吳謀楚先并小以剪除其枝葉然

後一舉而拔之州來伐矣頓胡沈蔡陳許之師敗矣而又滅巢

其黨憂其與寡郢雖未入已在吳掌握中

洪谷夔春秋說

○文十二年

楚圍巢則巢猶自爲國至襄二十五年吳伐楚門于巢則巢服

屬于楚矣

汪克寬纂疏

○滅巢而楚之內蔽撤矣滅徐而楚之外援

翦矣楚能不病哉

張自起宗朱時義

○楚所築三城俱爲吳有

顧棟高大事表

昭二十七年

傳吳伐楚圍潛楚救潛聞吳亂而還

昭三十年冬吳滅徐

左傳見書滅門○徐在江淮間實爲句吳通中國適荆楚之路

四年楚虔執徐子以斷其道則徐久服於楚而吳深憾之矣今

楚勢衰吳欲伐楚故先滅徐黃正憲翼附○滅州來敗胡沈滅巢執

鍾吾子遂滅徐楚之與國畧盡入郢之勢成洪咨夔春秋說○張說見上

昭三十一年傳吳侵楚伐夷儀侵潛六楚救潛吳師還吳師圍弦楚救弦吳師還始用子胥之謀也

所謂亟肆以疲之也顧棟高大事表

定二年秋楚人伐吳

左桐叛楚吳子使舒鳩氏誘楚人楚囊瓦伐吳師于豫章吳人

見舟於豫章敗之遂圍巢克之獲楚公子繁○報雞父之役而

召柏舉之敗趙聘飛經筵○經書楚伐吳七止此七伐僅一克于朱

方他皆無功張洽集注引許翰○所謂多方以誤之也顧棟高

定四年冬蔡侯以吳子及楚人戰于柏舉楚師敗績吳入郢

左蔡侯吳子唐侯伐楚陳于柏舉夫槩王以其屬五千先擊子

常之卒楚師亂吳師大敗之從楚師及清發半濟而擊楚又敗之五戰及郢楚子奔隨申包胥以秦師至大敗夫概王于沂秦師又敗吳師又戰于公壻之谿吳師大敗吳子乃歸楚子入于郢○楚雄江漢地大兵強有方城濮水爲之險蔽雖桓文二霸不能以兵入之今吳人乃能擣其都邑幾於覆祀者何哉囊瓦貪虐柄政不惟諸侯怨之國人亦莫不怨之觀柏舉之戰夫槩謂闔廬曰楚瓦不仁其臣莫有鬪志先伐之其卒必奔蓋不仁而失衆此吳人所以席卷楚都得逞其志也不然以楚之強豈一戰不勝卽不能保其國哉經書楚囊瓦出奔鄭吳入郢其爲有國者不用仁賢以致敗亡之戒明矣

黃仲炎通說

○楚爲中國患

久矣受其荼毒者蔡爲甚欒貞子曰漢陽諸姬楚實盡之吳人亦謂隨人曰周之子孫在漢川者楚實盡之天誘其衷致罰於



楚蓋自桓文之盛不能加兵於其國都雖劉文公合十八國于召陵不能問其罪據中國積憤者吳也故春秋特詳焉趙訪○

此匡正天下之大機也數百年僭王之強楚一旦破滅難矣吳姬姓之子孫也雪漢陽諸姬之恥誅蠻夷猾夏之罪撫輯其人

民疆理其土地請於天子爲存亡繼絕之義求諸亡國之子孫

而復之以分其土將桓文讓烈矣顧乃舍大爭小班處楚宮猶

之以燕伐燕而已賀仲軾歸美○蔡復其世仇兼紓中國之積憤其

事偉矣第楚敗吳與中國日衰矣書之傷之也御纂直解○楚昭

復國能任賢修政而復強蓋楚敗而懼是以不亡吳勝而驕是

以遂滅又哀六年○入郢之後貪暴不仁剽掠四出是以秦人得乘

其驕楚人得鳩其衆而吳無一卒可用也吳事事驕溢楚歸郢

後錄忠良棄舊怨事事脩自正吳楚興亡關鍵也翻辛料吳之

言傳關辛聞吳人之爭官也曰吾聞之不讓則不和深中吳人不可以退征吳爭於楚有亂則必歸焉能定楚

病根傳載之見楚人歸國亦由吳豈可乘非盡秦人足以制吳

以深惜吳人之無以成功也姜炳璋讀左補義○入郢奇功也吳倘能

收楚人之心定全楚之勢一舉而除僭王猾夏之毒豈非千古

一快惜乎吳本無得楚之志伍子又非天下才不過期洩其忿

耳趙佐雜案○据左傳唐蔡俱從吳伐楚而經獨書蔡先儒謂蔡受

楚毒最深善其能報仇雪恥故特書曰以乃余深考當日地里

知吳之入郢全憑蔡爲之鄉導唐不得與聖人亦第據實書而

非有意於褒之也案吳楚俱澤國皆善水戰而楚地居上流吳

常不勝故入春秋百年以來吳屈服于楚爲屬國者職是故也

遠申公巫臣自晉使吳教以乘車射御吳始用陸道與楚角逐

而楚始駸駸患吳矣楚既失長江上流之險迺更於淮右北道

築州來鍾離巢三城以禦吳吳於楚之水師克鳩茲克朱方悉

置不問而第日擾於廬壽淮潁之間逮克鍾離巢而楚患始棘

然猶未敢懸軍深入也至滅州來今江南壽州與蔡密邇蔡更道吳

舍舟從陸從淮汭卽州來歷光黃逕義陽三關之險至漢江北岸

與楚夾漢而陣當是時吳歷楚境一千一百餘里深入死地亦

未敢必能入郢故其戰嘗且勝且卻收軍至柏舉今湖廣麻城縣去小別漢

川縣三百餘里適會楚瓦不仁人無固志而夫槩身先死戰遂長驅入

郢五年楚復國卽滅唐報怨而不敢動蔡者夫亦以蔡近吳有

吳以爲之援故也則當日吳楚之赴告自必以蔡爲兵首魯史

從而書之聖人亦從而書之而豈有意褒之也哉顧棟高大事表

定六年傳吳太子終累敗楚舟師子旗又以陵師敗于繁揚楚國大場懼亡遷郢于都

由南而北遷以避吳也顧棟高大事表

哀六年春吳人伐陳

左吳伐陳楚救陳將戰昭王卒于城父。○陳楚與也吳之入楚使召陳侯陳侯不來吳人怨之元年侵陳今復伐陳修怨也陳自是與吳成。高閏集注○元年吳侵陳不書猶小用師也至此而伐陳蓋既得蔡又欲爭陳吳駸駸乎有駕中國之勢矣。張自超宗朱辨義

哀十年冬楚公子結帥師伐陳吳救陳

左楚子期伐陳吳延州來季子救陳謂子期曰二君不務德而力爭諸侯民何罪焉我請退以爲子名乃還。○楚之敗陳叛楚從吳六年吳伐陳九年楚伐陳陳固弱矣朝吳暮楚勢非得已矣救者非善也兩書之者見中國衰微夷狄爭諸侯也。趙鵬飛經筵

哀十五年

傳楚子西子期伐吳及桐汭

C 吳越交兵

越以伯禹苗裔受會稽別封入春秋百九十餘年始見經以吳楚之  
併其極盛也猶得書于越於春秋之世不過以國稱豈非僻陋之甚  
獨勾踐與吳之事可爲振偷激懦之勸蓋越自楚靈之強常從之以  
伐吳而闔廬之立遂因之以仇越是以夫差敗于檇李而懷必報之  
忿及勾踐困于夫椒遂成不釋之讐然二十年間越不爲沼吳其混  
矣吁深於仇人者無躁謀巧於用國者無近功當太王之時而不殄  
其愷不隕厥問以駮昆夷可也當秦襄之世而四牡孔阜駸駸孔羣  
以討西戎可也有田一成有衆一旅則經綸之餘力足以祀夏務材  
訓農通商惠工則漕之餘民足以造衛此皆已事之驗夫五千之甲  
衆至少也會稽之棲地至褊也參吳之計蓄於臥薪嘗膽之時而沼  
吳之志卒逞於生聚教訓之後豈非種蠶之善謀歟

李琪列  
國世紀

陳氏提綱說見吳楚交兵

昭五年越從楚伐吳爲楚通越制吳之始昭三十二年書吳伐越定五年書於越入吳十四年書於越敗吳於檇李哀元年吳夫差敗越於夫椒句踐行成旣歸國十年生聚十年教訓至黃池之後又書於

越入吳至哀二十年而越滅吳

李廉會通  
昭五年

吳越之事吾讀左氏內外傳吳越春秋越絕諸書詳哉其言之也夫吳不有越越將有吳此亦勢之必然者也二國兵端始於魯昭之二十二年釁自吳起旣而闔廬入郢尤常乘虛以造其國都越獲報矣檇李之役句踐敗吳闔廬傷趾而卒夫差嗣位臥薪嘗膽奮志圖報戰于夫椒吳遂入越子復父讐抑何壯也越會稽保師國存一綫若滅越而楚國可定吳霸可成以之尊周固同姓也春秋進霸亟許齊晉甯獨外吳不虞夫差驟勝而驕輒許行成伍員諫而不聽釋之歸國於是觀兵上國老師陳齊越人生聚教訓朝夕欲襲其後而夫差

不知至魯哀十三年而入吳二十二年而滅吳越亦有吳土號稱霸

王然則夫椒之勝適以驕吳而斃之耳

馬騶左傳事緯

智小而謀大力轉而任重積之薄而發之驟未有不速其敗亡者此

吳越之所以速亡也

魏禧叔子集

世嘗恨吳王不聽子胥滅越致越卒沼吳余以爲不然吳之亡以驕淫黷武耽樂忘禍輕用民力馳騁數千里之外雖微越吳亦必亡若使守其四境和其人民任賢使能增修其政越亦懼伏不敢動且吳之會黃池聞有越師邊遽奔歸太子戰死國之不亡者如髮而越未嘗不與吳平此時若能效句踐會稽之志則越能覆吳而吳亦能覆越猶越之國數句踐背德之罪而戮之天下其孰敢議乃因循至十年之久再受越帥卒迷不悟則非越之能滅吳吳自滅耳

顧棟高大事表

昭五年冬楚子蔡侯等

越人伐吳

越始見經

左楚子以諸侯及東夷伐吳越大夫常壽過帥師會楚子於瑣

○此爲楚通越制吳之始

李廉會通

昭二十四年

傳楚子爲舟師以畧吳疆越公子倉壽夢帥師從王

昭三十二年夏吳伐越

左吳伐越始用師于越也史墨曰不及四十年越其有吳乎越

得歲而吳伐之必受其凶○前此越從楚伐吳故始用師焉

高閔

集注○越楚之與也吳欲報楚宜結越以離楚黨則吳從事於楚

無虞也今未伐楚而先伐越是又生一楚矣故入郢未反而越

亦入吳

宜鴻飛經筵○此著吳越之始事也吳方抗楚越議其後自

是吳楚越不相爲下而齊晉一大國之患專在疆臣天下之勢

又一變矣

日謝解義

○吳當規楚不當構越構越則先增一內顧

之憂雖不犯歲亦凶也故傳言其始用師以譏吳之失策

趙佑雜案



定五年夏於越入吳

左吳在楚也○吳一出則內虛越襲其國如反掌而吳不之慮

前之伐越豈忘情哉伺釁而發矣

趙鸞飛經筵

○吳入郢而越卽乘

虛入吳申包胥以秦師至秦特吳之前越讓吳之後吳欲不歸

得乎

顧棟高大事表

○書越入吳著吳所以不得志於楚也

張自超宗朱辨義

哀十四年夏於越敗吳子馮李吳子光卒

左吳伐越越子句踐禦之陳于馮李大敗之闔廬傷將指還卒

于陘夫差使人立於庭苟出入必謂己曰夫差而忘越王之殺

而父乎則對曰唯不敢忘三年乃報越○吳子輕於伐越玩兵

以滅其身馮李吳地越追及此敗之

姜齊事義全考

○五年於越入吳

至此敗吳而傷吳子黃池之歲越又入吳春秋悉書之哀元年

吳子敗越棲句踐于會稽不書文定以爲會稽之役夫差復父

讐而非報怨春秋以爲常事不書非也吳能弱楚能弱楚則中國賴以休息而卒至於敗亡者越議其後也使不書越之入吳敗吳則吳之所以不能抗楚不能得志中國之實不著矣而吳之敗越則吳越之勝敗無關於中國不足以書也

張自超宗朱辨義

哀元年

傳

吳敗越于夫椒報槁李也遂入越不書吳不告吳越不告越也越子以甲楯五千保于會稽使大夫種因吳大宰嚭以行成吳子許之伍員諫不聽退而告人曰越十年生聚十年教訓二十年之外吳其爲沼乎

吳赦越未爲大夫惟其意不出於哀矜而出於驕盈其致敗在此不係於赦越也若赦越之後修備治國桓文之業也越其如

吳何

魏禧左傳經世鈔引鍾惺說

○槁李之役夫差使人立於庭出入必傲

是其欲得句踐而甘心者非一日矣今旣入越宜可復讐而願釋而不誅者何也亡國之君意氣用事欲之以大欲誘之以甘言即可倏忽轉移毫無定執由其不以義理爲權衡耳

又附彭家屏說

○胡傳謂吳敗越應告而不書疑聖人削之以爲復父讐常事其說非也既沒其事何由見常事不書之義哉蓋昭公娶於吳季氏逐君而替其夫人邦交方惡故赴告不及柏舉之戰乃蔡告克吳子之卒乃越告克而書之耳

方苞直解

哀十一年

傳吳將伐齊越子率其衆以朝王及列士皆有饋賂子胥懼曰是秦吳也夫

哀十三年夏於越入吳

左公會單平公晉定公吳夫差子黃池六月丙子越子伐吳大敗吳師獲大子友入吳吳人告敗於王冬吳及越平○吳自柏舉以來憑陵列國黃池之會遂及兩伯可謂強矣而春秋繼書於越入吳曾子曰出乎爾者反乎爾老氏曰佳兵不祥之器其寧好還夫以力勝人者人亦以力勝之吳嘗破越遂有輕楚之心及其破楚又有驕齊之志旣勝齊師復與晉人爭長自謂莫

之敵也而越已入其國都矣春秋初書於越入吳在柏舉之後

再書於越入吳在黃池之後垂戒切矣明傳○吳以東夷之雄憑

陵中國黃池之會遂霸諸侯然身未及還而越入其國兵敗於

郊太子為虜不數年而滅何其亡之驟也魏文侯問吳之所以

亡於李克對曰數戰數勝文侯曰數戰數勝國之福也何故亡

對曰數戰則民疲數勝則主驕以驕主禦疲民未有不亡者也

故春秋書於越入吳以戒後世好戰而無備者黃仲炎通說○吳太

子既獲吳國又虛何故越不滅其國蓋吳兵在外尚強未敢遽

滅之耳呂祖謙左傳橫說○於吳入郢之後書於越入吳以著吳之卒

不得志於楚也於黃池之後書於越入吳以著吳之卒不得志

於中國也凡吳之不得伯皆越為之張自超宗朱辨義

哀十七年傳三月越子伐吳吳子禦之笠澤吳師敗

哀十七年

傳三月越子伐吳吳子禦之笠澤吳師敗

哀二十年 傳十一月起圍吳

哀二十二年 傳冬十一月越滅吳請使吳王居甬東辭曰孤老矣焉能事君乃筮

句踐可謂有志矣奮於僻陋卒滅強吳其忍苦雪恥君子有取

焉惜其自是遂安於蠻夷忘意於中國 程公說分紀 C 越臥薪嘗膽

吳極欲窮奢越推賢任能吳戮忠從佞越視民如子吳視民如

仇越養銳待時吳驥武自困吳之亡徵決矣然吳棲句踐于會

稽而許越成越棲夫差于姑胥而不許吳成絕入宗祀覆人社

稷句踐殘忍甚矣 魏禧左傳經世鈔附彭家屏說

春秋屬辭辨例編

卷十五

辛

春秋屬辭辨例編卷十五終

卷十五補

吳楚越交兵論

春秋之季吳國天下莫強焉及其亡也忽諸世之尤之者以爲會稽之成一也艾陵之師二也黃池之會三也向微是者吳當遂霸天下然此皆自事之已形者言之而非其元氣之所由削福命之所由傾夫吳之亡始於通晉成於入楚而其構怨於越則由此兩事而起吳建國於江淮之間其疆隅不足當楚之十以形勢言則大江之與長淮楚皆踞其上流江東四戰之地不足與之爭衡是以自壽夢以前俯首而附楚者非特其風會未開抑且勢不得不然晉霸旣衰思出奇策以制楚巫臣又藉手以洩私忿其通吳於晉者非能確然謂吳之必可以制楚以爲卽令不果勝而楚之一歲七奔命已大病矣晉特利其目前之爲助而不暇遠慮於吳之卽楚也而楚亦不幸而適

在中替之日當國如子重子反子瑕之徒皆庸材是以吳得起而乘之然以累世強大之楚植根已固卽令不競豈能猝亡其國而諸蠻視吳素屬等夷其中必有倔強而不相下者斯越禍之所生也楚不可猝亡又生與國之患則吳之國危吳之國危其旁固非中原救援所能及是則輕其社稷之計而受人發縱指示之患以結歡於鞭長不及之地失策未有如是之甚者且兵者凶器聖人不得已而用之故曠武者造物之所忌也吳自諸樊以至王僚無不好戰玉帛外竭干戈近訐民力幾何而不困也強水師爲車戰違地利也凡若此者皆吳人墮於巫臣之計而不自知常是時非以王者之師臨之必不足以及亡楚夫王者之師何如當囊瓦臨陣之際宜其脅留列侯殺害忠臣之罪正告於楚之三軍以及其近郊遠郊之民則楚人自瓦解而倒戈繼遣一介上告天子及中原諸國宜其累世憑陵諸夏之罪



或許以反其侵地或許以繼絕九縣之封盡還其故則小國向風楚人將反爲吾用於是分兵歸吳以備不虞休土於楚以鎮新國則秦人必不敢出而數年之後入朝周室一匡天下大業可得而成矣今觀於吳則反是遲其封豕長蛇之習恣其倒行逆施之狀決漳水以灌紀南決赤湖以灌郢則民其魚矣夫槩王與子山爭處令尹之宮則在下之遭蹂躪又可知矣楚人痛心廟社之荼毒切齒家室之播蕩卽無秦人吳亦安得有楚卒之內變起外援至踉蹌而去所得不償所失而過此以往楚人之讐雖百世不解豈不懼哉晉人以吳困楚而楚人卽以越窺吳昭公五年越大夫常壽過始以師會楚伐吳二十四年圍陽之役楚師畧吳疆越遣大夫胥犴勞之公子倉及壽愛帥師從之其相結如此三十二年吳始用師於越而是役也越遂乘虛入吳夫吳旣素有不快於越而入郢之時全不爲備是亦可以

見其疏矣卒之櫛李之役反隕其身以致貽患於其子其後句踐與師中包胥實在焉則楚自遷郢而還雖不以一矢修怨於吳而吳實亡於楚也嗟夫天道好還故禍機之倚伏如轉轂焉可不懼哉

全祖望結

琦亭集  
外編